

近代中國史料叢刊第十輯
沈雲龍主編

撫新紀程

袁大化著

文海出版社印行

撫新記程

五里黑石關光緒十四年余奉吳清帥檄塞鄭口購石料於此曾住數月忽忽二十五年矣廟宇未改人民多非不勝今昔之感車過洛河鐵橋甚壯麗四十里偃師縣南嵩北邨至此漸開平壤寬者數十里土脈膏腴民居稠密途次多古陵寢逶迤相屬銅駝寂寞玉盤飄零憑弔英雄威靈盡矣四十里義井堡有餓夫塚在首陽山下迤西管鮑分金台又西金墉城遺址尙存鐵道穿城基而過四十里洛陽縣下車啓守綏祝令鴻元等來迎宿於行館計程四百三十五里自汜水西至鞏縣過山洞八至黑石關又過洞三車行洞中如深夜密窳促膝對坐莫辨面目長者經數分鐘始復明明則較倍尋常光耀眼纈沿途兩岸壁立黃土結成奇峯怪石詭異萬狀高者十數丈

五里黑石關光緒十四年余奉吳清帥檄塞鄭口購石料於此曾住數月忽忽二十五年矣廟宇未改人民多非不勝今昔之感車過洛河鐵橋甚壯麗四十里偃師縣南嵩北邨至此漸開平壤寬者數十里土脈膏腴民居稠密途次多古陵寢逶迤相屬銅駝寂寞玉盤飄零憑弔英雄威靈盡矣四十里義井堡有餓夫塚在首陽山下迤西管鮑分金台又西金墉城遺址尙存鐵道穿城基而過四十里洛陽縣下車啓守綏祝令鴻元等來迎宿於行館計程四百三十五里自汜水西至鞏縣過山洞八至黑石關又過洞三車行洞中如深夜密窳促膝對坐莫辨面目長者經數分鐘始復明明則較倍尋常光耀眼纈沿途兩岸壁立黃土結成奇峯怪石詭異萬狀高者十數丈

低亦丈餘岷崙中幹迤邐萬里至此脫沙變土結成厚壤有高至數十丈無片石者土質莫厚於此矣汜西虎牢關再西成皋關峽路卽鴻溝也古今形勝必爭之地鋒鏑銷沉河山如昔青史幾行名姓北邙無數荒邱前人田地後人收說甚龍爭虎鬪耶

念九日因差車未齊小住一二日答客畢出南門十五里至關帝林一瞻拜相傳吳送聖帝元於魏魏武以王禮葬於此面南向直龍門伊闕相距十餘里伊水來朝外有屏障洛河繞於後邙山擁其北形勢氣脉均極佳勝郭景純葬經肇起於晉何當時亦合葬法如此也垣牆高仞餘縱橫百餘丈古松數千株望之蔚然而深秀三殿皆塑像塚在殿後有石門後人摩挲久兩小孔光滑膩手四面繚以短垣

禁人踐踏不得入正殿中懸

高廟御翰威靈於鑠四字兩旁懸

德宗景皇帝回鑾時

賜額餘多人聯額碑碣不可勝記瞻仰畢啜茗於僧舍而回日已暮矣

是日先發十三車大風竟宵澈晝未息聞札馬營在洛東未及往

三十日大風終日未行夕風止車裝齊明日必行矣發電西安並給

晉兒書

二月初一日卯正行三十五里磁澗曾辛庵大令炳章備午飯新安
界也東有漢丞相朱買臣之神道碑神字以下皆埋入土好事者爲
之耳午後行三十五里新安縣宿於高等小學堂曾令預備行館並

晚餐辭不獲已受之城東一里許漢函谷關楊僕恥爲關外人築此非秦關也登視之勢險路狹左右置雞鳴望氣台台上各植古柏一關門題漢函谷關四字新安城樓高踞西面正當其衝其扼塞更勝於函關有萬夫莫開之勢項王西上秦將拒諸侯兵於此莫之能禦亦地利不如人和也住定步出行台後門登北城牆牆踞山巔與東南隅奎樓山皆因回亂某令將兩山圍入城中以備戰守頗得形勢澗河過城南折而南而東而北復從關門外向東流去北來小河會之城之東南西三面突起三小山如三台南有大屏障北來山勢甚雄至此截然而止其結地當在北山前也聞自有明以來呂姓多名臣生其地至今稱爲呂家大山計行七十里

初二日卯正行三十里鐵門營辛庵借行宮旁舍預備尖站東南有
棋盤山相傳卽王喬爛柯處午後天氣甚暖從者以爲可到澗池余
先行二十里倡義橋二十里石河又三十里澗池縣張子政大令錫
典備行館於高等小學堂住定後車僅到數輛泥深沒軌兩縣民壯
修補未竣有住石河者有住十里鋪者楚兒坐予車知余住此派人
將襪被來已二鼓賴此得安枕次早已午間人始到齊沿途順澗河
西上日數渡縣西則澗水非澗河也澗河自黛眉山五龍潭發源從
城東北來會之北有魚池南有藕池龍池或卽澗池之所由名歟
初三日車到齊已十二鐘午飯後行二十五里英豪住路多泥淖車
陷其中十餘馬併曳之始出行路之艱至此蔑加回憶余藩汴時曾

以開渠修路列爲功過派人督責今猶具文視之官民之疲良可慨矣張錫典送余至此辭去英豪之西卽陝州界旅店湫隘密雲欲雨心以爲慮夜夢還鄉遍晤家中老幼惟愛孫汴流未之見悲甚覺後知爲夢或來時恐汴流知之不放余行也瞞之而去至今夢魂中猶以爲憾歟抑小孫戀祖時常呼吾夢寐不安也亦奇矣

初四日卯正行二十里觀音堂陝州岳奎章直牧廷楷備尖膳途中陂陀上下非嶺卽溝溝則泥淖嶺則峻阪自英豪起肩輿前卽有四人曳緯而行名爲緯夫嶺峻故也向例顯官過境旅店支應地方差使派四人曳緯過山卽回不給錢余每人酌給飯錢四十文又二十五里碓石鎮卽崤陵前途泥深難行擬宿於此鎮店少不足容多車

有分住廟溝者岳令備行館於行宮舊址兩廂倒塌不堪惟前後殿及頭門完善硤石卽隋硤石塢唐硤石縣故地其東硤石嶺上下二十里盤曲如羊腸數爲上下一夫所守千人莫過眞要隘也道光十八年新開大路崎嶇難越峭山二嶺一南一北其北陵爲文王避雨臺緊臨鎮北山勢雄厚松柏聳秀上有紫微宮供周文王神牌宮內有琉璃井山後有二郎洞其南陵爲夏后皋之墓相去十餘里晉敗秦師於峭獲其三帥卽此地也自古以爲險要宜峻絕如此過時陰霧四塞雲靄蒼茫猶帶昏霾氣象疑項王阮秦卒故地距此不遠歟洛陽東西邙山土厚無石至漢函谷關石山陡峻新安以西路多碎石過硤石則巨石林立山勢雄峻潼關以東最爲險要古今戰場多

在於此至今過之猶陰氣逼人

初五日卯初卽行沿途大石嶙嶒所過溝塹泥深沒軌車陷其中人推馬曳牛晌始出三里廟溝有關門據其東口名三里關頗扼險要二十里張毛過衛店嶺路僅容車兩岸壁立數仞無片石路漸乾二十里磁種岳直牧備午飯又三十里至陝州路乾多塵溝深十數丈無寸石土厚又過於鞏汜兩邑南望嶺漸平車行岡上甚廠闊北瀕河不見山城中荒涼甚有召公祠召公分陝而治遺蹟猶存祠內荒榛滿目有古甘棠樹乾枯不知幾許年有古鼎一在池北天井中前立一碑刻古鼎碑記四大字模糊不可辨餘多明代碑碣岳直牧爲余備行館於巡警講習所同城文武官吏皆來謁住定往答拜河陝

汝道胡端臣觀察祖謙頭門鑒唐河南道瀛額署中冷落政肅刑清
庶幾近之州署照壁外有古樹一株斜向西南傾生冬青六七棚垂
如烏鵲巢狀甚奇異殆天地磅礴之氣所種歟黃補臣太守壽袞權
稅於陝郊迎授餐意極殷摯復有送行詩云策馬向西林老臣愛國
深天山萬里路師弟百年心新茁陽關柳高彈塞外琴縱橫定狼虎
駑附愧知音

初六日卯初行出南門過澗河水濁入黃多開溝渠引水灌地大利
也二里許南關有關門二橫巨大道中鎖鑰甚嚴旅店多在此出關
入峽中兩岸深十數丈路狹而坦二十里溫塘大村落溫泉可浴泉
水出山卽冷十數里大營村有土圩入東門出北門高原平闊北臨

黃河過河卽山西界也二十里曲沃鎮有行宮葉少蓮大令承祖備行館於此因前車已過余稍憩卽行二十里靈寶縣尖漢宏農郡也平原開曠南有土嶺亦不高峻居民皆住窯洞中城東多許姓神道碑前明大族也四世相國閼闕相承極一時之盛今已零落矣行館卽許姓舊宅正房三間一明兩暗作窯洞形甚堅固北距河八里許鹽局委員崔令雯隨同接送午後出南門過澱水卽唐朱溫逼昭宗東邊過此水僅餘小黃門十數人相隨者也西面兩山雄峙關樓高聳古函谷關也樓內塑老子像笑容可掬手持一書作說經狀尹喜侍右童子立左青牛伏於後若皆有所悚聽焉關前一石上刊殷直臣關龍逢之墓乾隆年建關門聯云未許田文能策馬願逢老子再

乘牛典雅可誦登樓遠眺大河前橫激水繞之靈寶當其衝眞險要也裴子伯謙河海岷崙錄云如假精兵萬人決黃河之流遮桃林之野雖開關延敵東諸侯將逡巡而返矣諒哉入關兩岸壁立溝路陡深數仞仰視青天寬不尋丈皆青白土結成數千年未嘗傾圮去秋大雨如注竟崩數十處溝路爲塞行人苦之二十里出溝渡河至稠桑驛店少不能住又行再入溝路寬僅容車二十里達子營宿日已昏黑闔鄉辦差家丁聽戲他往自尋荒店下榻土坑小屋不能禦風搯帳而臥楚兒等三人臥於前夜風大作怒號有聲是日計行百里初七日卯正行高原廠闊南北六十餘里東西近百里南則秦嶺高峻積雪未化北則中條山橫亘河朔黃流貫其中沿河數十里皆沃

壤水深土厚漢置宏農郡於靈寶有以也古稱桃林塞絕大戰塲設
有兵事非夾河上下不足以制全勝以堪輿家言論之秦嶺東行申
條西向自太原東山南下回龍顧祖結穴於平陽蒲坂爲古帝王都
會良不誣耳二十里闕鄉縣尖孔令繁昌備行館於大王廟廟前作
挑水石垣二所以護城也近河分出兩沙夾河而下頗具形勢飯後
行入溝路兩岸陡高數十丈十餘里一出溝溝前澗河橫流入黃有
烟火十數家餘則絕壁懸崖塵土滿目西行入關者不絕於途四十
里闕底鎮巡檢孫金塘來見余藩汴時所委也二十里潼關宿黃河
兩岸突起大山河流如束帶潼關高踞嶺右扼其衝要水陸均難飛
渡初入第一關卽金陡關攀籐而上東來函道首扼其衝大河繞於

北秦嶺距其南梯航均有所窮第一險要也過此尙有關門數道漢唐以來稱爲重關天險豈虛也哉同城潼商道齊觀察蔭南潼關協桂聯輔和都司李君潼關廳劉際良均來接見廳轄軍戶五千餘皆昔年屯田守兵子孫隸於軍籍地糧悉征本色有風陵渡設巡檢一古風后陵寢所在也陵葬河中今失其處仍存渡名劉際良司馬備行館於五省行台甚宏敞中多唐槐晚復陳堯齋電速其西上堯齋已行至奉天值驗疫折回汴梁是日計行八十里實有百里

初八日卯正出西門關門兩重甚雄狀標兵排隊行跪送禮甚不敢當地方文武官郊餞如禮西風大作霧霾不開數里不見人物經舊城基輿夫曰滿城也今無人矣十里釣橋東有漢太尉楊震墓四知

坊北二里許弓長楊家卽其後也黃河由此北曲矣三十五里華陰廟宿衛隊連日奔走疲乏稍歇半日入廟謁西嶽華山之神遍閱漢唐以後碑刻庭前古柏森天老槐仆地大逕數圍東北一株標名秦柏實唐宋時物也西南面已枯東北面樹皮深皴如老龍鱗一枝尙茂密小槐寄生其上我來撫觀恰合槐柏主人舊號矣攷西嶽華山漢建武中嘗使二千石歲時祠祀勒文於石至延熹初字已剝蝕宏農太守安國亭侯汝南袁逢重鐫文字卽世傳西嶽華山廟碑也關中漢碑此惟最古原石斷爛已不可復觀况秦柏乎登萬壽閣正對華嶽三峯惜天氣溟濛不得一觀廬山眞面爲憾前院西偏有老柏一株榜曰老子拴青牛處相傳老子偕尹喜出關拴青牛其上今樹

皮剝落而斑紋古秀如虎頭如靈芝無巧不備鄉人環禱香火極盛
青牛樹旁生皂莢樹大可五六圍狀如連理根交於下枝抱於上相
交處亦生芝紋如乾柏形尤奇其東有兩槐老不紀年南有唐元宗
御製碑經火焚碎祇餘三半字廟基方廣佔地二百六七十畝築長
垣圍之

聖朝兩次重修並費十餘萬金一椽一椽大皆合抱亦巨觀也華陰令陳
協華字實生設行台於廟之東院故得詳觀之購廟碑數十種惟漢
碑陰殘石最佳自出潼關西來柳陰夾道望之如硤路然皆三十年
前左文襄西征時種植柳皆成材紋赤質堅作器具與皖豫蒲柳不
同兩旁深溝流水潺潺灌地周匝每十數里一渠遠自華山引來稻

田藕池麥地均極肥美民力之勤地利之富較之河南氣象迥殊矣
初九日卯正起密雲細雨冒雨行三十五里敷水尖華陰陳令送至
此備午餐飯後行雨未止從者衣履皆濕二十里柳子又二十里莘
州住津人王同生州牧世英預備行台陳令垣在此守候未行汾陽
故宅在少華門外里許有祠宇牌坊守祠郭姓尙不乏人聞其祖墓
在赤水西十里東向少華山來脈明日當過之汾陽陪葬肅宗陵在
醴泉縣東北十八里五牀山也親家王襟三觀察榷稅於潼出關迎
余闕底鎮一談入關過其局拜之夜來行台暢談次日送余至華陰
廟談至子正而回今日冒雨送余於華陰城南別去蓋有志遠行出
關從予也華陰以西平原開敞南北寬二百餘里東西長六七百里

產糧甚豐價亦廉夾道左公柳尙茂密聞有被土人偷伐者亦地方之責也敷水西至柳子荒地近二十里原有舊渠可以疏洩灌溉地方官疲於新政漠不關心惜哉問其致荒之由因渭河淤墊漸高南臨高山北阻淤渭水無所洩是以棄之然何不開通東西大溝直送黃河耶卽挖低培高高爲旱地低爲水田亦是一法特皆未之能解耳

初十日卯正行雨止雲猶四翳少華山仍未露出西關路北有宋寇萊公故里碑萊公華州下邽人自此至下邽鎮尙六十里今隸渭南縣在渭北五十里居黃渭之間大河華嶽會於潼關以西沃壤七百餘里寬亦二三百里天地菁英毓爲良相惟嶽降辰信然三十里赤

水鎮周處故里孝侯斬蛟祛豹改行爲善所謂除三害也鎮西河寬十餘丈即赤水有長石橋或卽斬蛟處汾陽祖墓在其西匆匆一過未得瞻仰路遇余壽平方伯誠格赴鄂任道左立談片刻別去二十五里渭南縣行台住楊和甫大令自赤水馳歸與談地方政治尙明晰城東十數里傍渭河有太公釣魚台同日接見李管帶梁縣丞王典史數輩

十一日寅正卽起天未曉同人皆先發余亦遂行縣令未及起李管帶送余西門外時猶未辨色四十里零口尖臨潼縣張瑞璣差人備晨餐於行台余與賓兒漢兒楚兒同食餘皆先飯而去意在早到臨潼就溫泉一浴也飯後行十數里戲河崗相如墓在焉豈奉璧歸趙

後復入秦故葬於此歟又十里新豐城東門外有碑記南垣楚霸王
晏漢高帝處東南五里許有鴻門堡卽鴻門晏處也當時楚軍鴻門
漢軍灞上相去僅五十里范增舉玦項莊舞劍樊噲側盾張良躡足
若何忙碌漢王始得脫身而去新豐城乃高帝五年築以娛太公者
今已非其故處城西纍纍數塚不知何代寢陵又十里越土嶺遠望
驪山下孤立一塚下方上圓如陵如阜問之輿夫曰秦始皇墓也驪
山多硫磺常出雲遠望如蒸炊氣蓬蓬上惟山勢頑惡逼近陵前羣
砂如亂箭穿胸面牆而立岸壓穴星奴強主弱餘砂裹頭渭水過後
宜其骨肉未寒趙高禍作不二世而卽覆亡也然暴如秦皇卽得龍
眠佳城詎能長久但天造地設構此凶地以葬暴君斯亦奇矣十里

臨潼縣宿溫泉行館泉初出一大池繼分數小池引入各室頭池熱如探湯可祛痼疾二池在大廳西首最溫和潔淨余卽沐浴其中有餘泉流出牆外分東西兩水灌園一里許尙有熱氣館爲唐華清宮舊址溫泉宮長生殿集靈台皆其地相其形勢頑石惡砂氣帶凶煞秦以驪宮亡唐以華清宮亂彫牆峻宇內作色荒咎徵由人又豈獨山川之故乎俯仰古今不勝興亡之感是日計行八十里
十二日卯正行十五里斜口有渠甚長大可灌田二十里至灞橋橋橫灞水上架石爲之長三百步計七十二空寬兩丈餘自唐以來千餘年高出水面尙丈許相傳爲尉遲恭監修下流二十里入河渭灞上古塚纍纍多漢唐陵寢咸長兩縣尙有志乘可稽又十里澇水橋

亦石爲之略短於灃橋道光十八年建東西兩牌坊東書輞川勝境西書長樂要津過橋以西十里至西安省城土極厚車路如溝道旁古陵尤多南嶺環之終南山爲外屏障卽秦嶺也北距渭河三十里灃澆兩水自東北流注之豐鄜澇水又自城西入渭北高原平阜夾輔而下局勢緊嚴所謂八水繞長安者也其大水口仍在潼關秦嶺華山繞於南中條山麓迎於北黃河自青海發源東北流入蒙古曲折南下入邊千餘里至潼關一東陡折而東洛渭隨之西開平原數百里重關要鍵天府之國帝王之州也入城東關接官廳將軍巡撫都統等跪

聖安現任司道候補各官咸在茶敘數語入行館將軍巡撫都統復來會

司道府縣以次請見日昃未遑食

十三日未行回拜同城各官恩藝帥談最久將軍文芝亭左右都統及司道均以次晤談省城興辦新政名目應有儘有街道土石夾雜坎窪難行街旁暗溝塌露深陷穢氣觸鼻一失足卽落其中生齒頗繁似多無業者市面不甚整齊財政歲入三百餘萬難以敷用紳民氣亦囂張連日陰雲翳日夜間細雨濛濛滑躑難行得咸甯長安縣志各一部

十四日未行早出拜客往觀碑林唐宋至本朝碑刻四百餘種以右軍草書心經爲最祇餘殘石三段闕略不全其餘明皇孝經聖教序消化閣尙佳石刻十三經有補字亦可購惜無拓出者恩藝帥文芝

亭及同城官邀赴陳列所譙飲樓上陳設工藝尙佳房屋高爽暢談一席而散回寓已二鼓矣

十五日陰卯正起雨止行文武官送至西門外二十里三橋鎮成長兩縣在此備尖站飲酒數行而別鎮東卽鎬水鎬京鎬池皆其地西南十數里細柳原亞夫屯兵備匈奴處渭北有細柳營或分兵於此耳有周穆王陵十里豐橋古豐水也北流入渭橋長百餘步石礎覆板掄土其上文王遷豐處在其南十餘里河東靈臺河西靈沼古蹟猶存又二十里渭河浮橋中流繫舟夾岸築木椿架筏覆板其上以渡名曰便橋所謂造舟爲梁者也過河入咸陽縣仲山渭水之陽也漢曰新城亦曰渭城畢原跨渭南北文武成康陵在其北原陪葬有

太公周公魯公等墓孟子曰文
二十里漢陵在其東南高祖長
北涇之南渭之北南有秦嶺北
令林立大城人備行館送唐碑
日計行五十里

十六日早出城北門古塚纍纍
丞撫陝時題漢成帝延陵碑披
文陵方而平有廟碑古樹蔥蘢
右列於前皆有廟碑土人名爲
向終南山張如屏風秦嶺環其

山涇渭會於高陵大河華嶽聚於潼關爲大水口崑崙山自西域蜿蜒而來至秦隴分支東下中結大平原跨渭南北數百里土高脈厚數十丈無片石至潼關一束氣關鎖甚嚴文武成康周召太魯同埋聖骨於此宜其卜世三十卜年八百眞帝王之宅開關以來所未有也四十里店張驛興平縣界縣令派人備行館午飯後行數十里望見九峻山唐昭陵在焉常有白雲護其頂陪葬功臣數十人醴泉在其下舊城去陵十八里今縣六十里其西武將山又西五牀山建陵也其陵圖皆載於醴泉縣志四十里醴泉縣城宿東門外有太宗祠聯芝亭大令祥興京人備行台具肴饌是日早陰晚出日計行八十里潼關以西高原平闊種麥爲大宗少雜糧與中原小異糧價較內

地減倍半產糧多而無鐵道轉輸故也少大村落民有住窖洞者回
匪之亂死亡太多尙未復元北山荒地報墾升科者多係川楚豫三
省客民歲歉收則逃去來歲被他人佔領復來控爭聞今年棉花豐
收皆東運入關其地民風純樸但多憔悴形枯槁氣老幼皆然不知
何故秦中自古帝王州豈今日氣盡力竭耶

是年九月朔卽兵變
城陷生靈塗炭矣

長安舊城

咏古

山河王氣鎖關中漢武秦皇一世雄
抔土未乾宮闕火空留渭水自

西東

醴泉縣望昭陵

距陵六十里九峻山一峯高起晴天百里
外卽望見陵依山爲之陪葬功臣甚多

九峻山外望高峯突兀昭陵是太宗蕩盡羣雄餘霸氣白雲終古不

開封

常有白雲護其陵頂收而復出
竟年如是人以爲陵氣盛云

十七日卯起陰雲迷霧出醴泉縣北門聯大令送諸途高原平闊麥苗敷地居民多築圩牆無大村餘皆穴處四十里乾州住賈可聲直牧山東人乾州唐之奉天也好時縣在城東七里十五里六陌晉將軍周處攻齊萬年戰歿於此道旁有周孝侯殉節處碑漠西上宜在其西北距梁山十二里秦始皇游梁宮見宰相車騎盛惡之人告之滅車騎始皇怒其洩中語詔捕當時在旁者悉斬之大王去邠逾梁山邑於岐山之下卽此也唐高宗葬乾陵居山最高峯武后附焉後經黃巢掘其墓墓西有黃巢溝十二楊村在州東南以奉天之地四百頃奉楊震後裔十二子隨所居號十二楊村州西南四十里有蘇

武故居典屬國後代有偉人爲武功大族

十八日晴寅正起卯初行月色尙明賈直牧送至北門出門入峽路北行土厚無石兩山對峙於北其上有石如華表者各一土名瓜破嶺嶺後大山卽唐高宗乾陵也山前有碑乾隆間畢秋帆中丞沅題唐高宗乾陵五大字陵依山爲之山頂皆青石中數丈淨土當時劈山砌墓納梓宮而封之仍如山形墓城宮殿今已無存四門石獅各二高丈許距獅數武地稍寬有高土壠二墓正南門對立小石人兩排排分四行行六人計四十八人石人頭皆被土人搗毀據云石人皆活每夜蹂躪田禾四方受其害故毀之鄙哉野人之語又南石人石馬石虎石羊長列半里直至瓜破嶺嶺中缺如門前則高原平列

三陵俗傳有狄梁公墓武后陵或卽在是歟攷乾陵卽古梁山之最
高峯峯前束氣如鶴莖至瓜破嶺起突開敞嶺前高原平闊結穴必
在此乾陵乃來脈山未結穴或取衆山皆平高者獨尊之義五十里
監軍鎮永壽縣界童令派人辦尖站路多泥濘望前連雨數日路旁
溝深數十丈人行其上每一下視頭爲之眩出西安城偏向西北行
今日正北行矣自此入隴一步高一歩午後行二十里蒿店十里穆
陵關嶺漸高仍無石回望昭陵乾陵猶在目又十里武陵山下山卽
永壽縣宿於行台隴阪從此始矣初下陡峻如懸阪縣城烟戶數十
家歷歷在望將至城右山左澗僅容一車折而北入西極雄關也泥
深數尺肩輿入館寸步難行大車困頓可想地瘠民貧縣無車輛給

價打過站遂令車輛露處城南無須進店免得進出維艱永壽古鄆地四塞皆山路陡絕穿城過扼隴阪之東口障秦渭之高原築城鑿池最關險要光武征隗囂至漆卽今永壽縣城又名新平縣城南十三里扶風舊治陸賈墓在其西南城內有惠民泉呂大防導於前鄭居中修於後皆賢令尹也

十九日陰寅起卯未行車輛至此向例加套未齊余促之先發傍城西北行卽隴阪也山陡峻有塊石先向西南行折而東北再折而西北傍山盤旋泥淖沒軌每一車陷解數車之馬曳之始出輪環前進兩邊絕壁懸崖跬步維艱峽路高數十丈驍馬單人多行其上每一俯視頭目皆眩而澗底仍在大路以下百餘仞一夫所守千人莫度

隴阪自古天險草昧英雄代有割據良以此耳今成腹省爲入隴必經之途行旅出此惟騾轎坐人駱駝載物最爲穩便童令送余七里許告之修路對以一年一修余曰未得其法宜中高兩邊微窪水有所歸出水之處窪其地而鋪以石使水順流路不下陷自不至如此難行矣童駭唯唯而去二十里分水嶺五里下坡順溝行尙無泥窪十五里大峪口過河邠州界魏禮庭直牧立派人備公館具酒食余先至車在後尙遠宿此以待之二鼓始到數車餘尙滯在半途次早解驂數十往援之已正方齊

二十日陰車到齊已刻行兩車併一先送過嶺十五輛再併前車之馬回援後車初上坡西北向轉而東南向十三轉而抵十里坡路旁

壁立黃礪土高者數十丈不見片石俯臨深澗仰視懸崖令人慄慄
居民住窰洞過比以北高原平闊地平綫高出海面數百丈山頂仍
種麥田故土人悉呼爲原二十里邠州住魏直牧迓於城外沿途童
山無樹地半荒蕪丁口僅數萬吏治不修無以休養生聚故也邠卽
古豳國城在州東北三十九里豳亭漢爲右扶風左馮翊上郡北地
安定五郡地自唐明皇因豳與幽字相似開元十三年詔曰魚魯變
文荆并誤聽欲求辨惑必也正名因改其字爲邠昔夏政旣衰不窳
失官而奔戎狄之間其孫公劉變於西戎邑於邠至大王始修后稷
之業務耕種行徹田民多歸之其後逼於戎狄而遷岐漢李育公孫
賀傅介子皆生其地代有名人唐宋以來王侯輩出范文正嘗治此

地極狹隘祇能設關卡不宜府州城四面高山涇水帶其東火砲大興之世有事時不能守也魏直牧贈醴泉銘萬年宮兩碑爲其署鳳翔屬麟遊縣時拓碑在麟遊縣也萬年宮太宗書確係原石惟醴泉銘字被人刷深已失率更本色耳

二十一日陰有雲霧卯起出北門西西北行左山右涇涇右仍山土人皆呼爲原穴處其中有棗林長十餘里傍涇西南岸詠幽風八月剝棗一語猶見古昔遺風傍涇河南岸行二十里大佛寺石骨嶙峋蓋明岫山也佛就岩石爲之高八丈餘停輿登樓瞻拜第二層樓簷正對佛頭旁有觀音像亦就石刻成西院一洞有後周磨崖字餘多唐宋元明題蹟劣僧置灶其中烟火薰黑如漆多不能辨東院石洞

有范文正摩崖題筆居人鑿孔置樞以壞其字良可惜也佛閣三層
依岩鑿穴飛簷畫棟聳插崖前望之如仙山樓閣山行至此耳目一
新唐貞觀間命尉遲敬德監修屢經兵燹舊洞猶存所添修者前面
樓閣耳又二十里亭口鎮長武縣界沈吉卿大令備尖站於此過蓬
溪河土名黑水在亭北入涇夾帶泥沙皆黃水也與涇河無異黃濁
過於涇自邠以上涇水淺流急而濁邠以下水深流緩而清故有涇
清渭濁之分午後過大嶺盤曲而上路經沈吉卿大令派人修墊河
築土橋車行無阻四十里長武縣宿於署西院地主潔夕膳送唐碑
拓本及縣志攷長武縣爲秦鶡觚漢鶡觚陰槃淺水三縣地唐置宜
祿縣薛仁杲投唐處在城東郭汾陽單騎平番處在其西高原平闊

百餘里唐於長武設昭仁寺超度戰亡士卒自古爲大戰場唐人李華作文弔之卽其地也今百里侯封居民不過三萬高原之上井界秩然地多荒蕪安得賢令尹久於其任培養元氣以盡地宜歟周以稼穡開基數十世山幽而秦而洛以故千餘里高原土山自麓至巔皆開成地十數層至數十層鱗次井井穴居其中望之如蜂巢民風古樸見而生羨從知文武之治道在生人後世之時君多殺人也二十二日陰寅起卯行細雨沾衣三十五里窰店鎮長武涇州分界處自此入甘肅境沈大令送至此回又十五里瓦雲驛涇州金少逸直牧承蔭來接見備行館晨餐陝甘交界之區高原廠關南臨汭水北有涇河會於亭口鎮歷代多設大郡於此邠涇爲東西兩關隘中

開大平原用衆務夷自古以爲大戰場晉魏以來尤多疆場之事姚
紹敗勃勃於馬鞍坂唐太宗平薛仁果於淺水原舊俗淳樸近習武
健後世至欲以文德綏之蓋可想見午後晴十五里窰店鎮三十五
里涇州宿於南門外之行台涇爲古義渠戎地卽漢之安定郡涇州
坡上數里陝路陡峻壁立數十仞餘皆深澗無石地極險要控扼西
陲兩重關門扼其口甘省之咽喉邊徼之門戶也城西北緊臨涇水
兩河居民不過三萬人入少地多每一州縣監犯一二人盜賊亦少
古樸可嘉氣勢雄偉峭拔實與關隴名山大川相輝映其東朝那關
兩岸聳峭壁立削成是老上單于之所從入也北則回中山岑關凌
雲瓊漿灑露爲周穆漢武翠蓋臨御之所前有瑤池後有共池密康

公隨共王遊此南弁耳錦屏遮塞西百泉飲馬長河郭汾陽韓范諸公之遺烈猶有存者古今重鎮節度刺史代有名人敬德子儀稚圭希文其最著者也

二十三日晴辰行肩輿出北門過汭河車則過涇河至回中山千里來龍至此截止一峯高秀石洞林立上有三清樓又上文昌閣極頂王母宮前有瑤池一鏡澄澈古王母降生處也周穆漢武祠各五楹瑤池在其西皆遙望而未得一登以爲憾傍山腰西行車輛經其下過涇水者數三十五里王村鎮行台午飯金直牧送至此午後天熱三十五里白水驛宿於行台泉甘美平涼縣廖近之大令派差備肴饌邠州以西天氣稍寒沿途麥苗纒青柳色未黃較之長安兩邊氣

候迥異左公柳甘界尙整齊無甚短闕今日過數小水皆可爲渠灌田惜無人經理橫流於道行者苦之是日傍涇河南岸行七十里平川寬約一二里至四五里皆種地居民二百餘家

二十四日早陰晚出日大風揚塵對而不見人卯刻行西偏北向柳陰夾道交柯接條仍傍涇河南山麓山水下流路成泥淖土人不知鑿渠灌田良可惜三十里至四十里鋪平涼縣備午飯於行台沿途居民漸多半窳洞半瓦房童山枯草小兒驅羣羊於嶺腰望之如積雪片片山地層次較少於東路滿種一季麥已敷經歲食餘糧不思多種矣接見德游擊海劉管帶思忠午後行四十里至平涼縣宿於試院接見熙後舫觀察麟慶望臣太守隆廖近之大令元信等以次

答拜攷平涼自秦漢以來爲涇陽朝那烏氏等縣屬安定郡置廢不一後世名號紛繁元併潘原置平涼明及

國朝因之其名最久山以崆峒笄頭彈箏峽爲最險雄視三關控制五涼其地代產名人以皇甫規與梁統之族爲最盛初到此衛隊什長鄭紹中患病歿鄭余堂妹之次子也甚傷之葬於城西義地立碑而行回民皆住東關不准住城內回勤漢惰貧富因之市面亦然

二十五日早起陰雲四布親定鄭紹中穴向壬兼子三分座山左右砂對岸山皆佳涇河分五道如金花過其堂臨官星亦大崆峒山在其外佳穴也聞有遺腹子後必發送者畢過涇河西北行入瓦亭川楊柳夾道裴子伯謙崑崙錄云入亂山中四無人烟澗水怒號寒風

蕭瑟雉兔馳突實景也四十里安國汎尖仍平涼界午後行十里蒿店汎以西諸山細沙流注糝青黝綠似有銅鑛峭壁插天二十里三關口卽金佛峽也山至此突起高峯一水中流寬僅二丈一夫當關之地從前路在山上光緒元年魏午莊光燾備兵隴東督師開道砌石山麓行者稱便吳清帥奉使隴阪刻石記其事余停輿入廟瞻拜正座聖帝西廂楊六郎東廂七郎也有塑像畫像禱求靈驗又五里南來清水筭頭山發源北支涇河也西來濁水六盤山發源隴河也至平涼入於涇十五里瓦亭汎宿於行台有城堞甚嚴整固原州距此九十里王平山直牧學伊來此接見送新志書一部官聲尙好駐汎守備湘人在此三十八年瓦亭古要隘爲三關之一唐與回紇畫

界處宋吳麟使其子吳挺敗金兵於此四面高山兩水會於前城在北山麓渡隴咽喉之地隗囂聞略陽陷急派大將牛邯守瓦亭亦爲此耳

過三關口 即金佛峽兩山夾峙壁立千仞寬僅二丈許一水中流觸石怒號光緒元年魏午莊光燾督師開道吳清節刻石記其事

奉使天山萬里行三關峽口隘彈箏 彈箏峽在瓦亭左近亦要險 兩峯夾峙日無

影一水獨穿石有聲西極咽喉惟金佛東門鎖鑰勝高平 平涼城東南高平關

在三關口東七十里 爭城拓地今誰是空說六郎有弟兄 關口有六郎廟畫像塑像七郎像在東廂

世人數會謂六郎守關非也

瓦亭關行 與六盤隆德爲三關以三關口爲總口也

地近彈箏峽古稱瓦亭關東瞰三關口西傍六盤山度隴咽喉地出入最險艱南臨開威嶺隴水流潺潺四塞古戰場白地血染殷我行三邊外憑弔淚潸潸

二十六日晴有雲霧卯正行送者如禮出南門渡隴水亦涇源也彈箏峽在其上路傍開威嶺東麓西南行十餘里和尚鋪六盤山麓也車至此脫驂併馬輪替過嶺余乘肩輿緯夫八名曳之而上初向西南繼轉東北十八盤而至山頂中至廟兒坪稍憩息有關帝廟魏午莊光緒七年重修駐防兵十人於此皆傍高山南麓盤旋而升每一回視萬丈懸崖心驚目眩嶺巔北有行台南官店陶子方督陝時所建現皆頹敗不堪登峯遠瞭以六盤山爲最高積雪未化隴山頂也

韓魏公嘗建關置戍於此回視東南高山峻嶺直接崆峒再東南則與秦嶺諸山相銜接東北山勢懸亘亦與此齊瓦亭關深藏山中勢難繞越飛渡故爲隴阪扼要關鍵而路之盤曲險阻自潼關以西則以六盤爲第一山勢雄峻元氣渾淪水亦東西分流各不相混西面傍山北麓盤旋而下五里楊店汎汎皆有千把外委守汎帶兵來接窮困不堪隆德縣程幼佩宗伊祥符人來接見十五里隆德縣城住隸平涼府古義渠烏戎地歷代沿革或屬北地或屬安定平涼明置羊牧隆城後改隆德寨縣南六十里祭旗坡宋曹瑋征吐蕃時蓋禱焉西二十里得勝披明馬文升於此破敵西北十五里韓魏公經略西夏於此屯兵四圍皆隴山亦戎馬干戈之地也自過平涼以西

荒涼滿目以隆德縣爲最甚宜招徠流寓墾牧兼營培養元氣爲第一要政餘皆緩不濟急也當事者其圖之今日西南行五十里

六盤山行

卽隴山之最高者

步出瓦亭門隴水西南灣開威嶺東麓四面亂山環行抵和尚鋪直上六盤山山嶺高萬仞自古號雄關羊腸十八折步步險而艱流注彈箏峽風激水潺潺鴛蹇思顛躓猿猴愁援攀我車輪爲摧我馬力爲殫欲前且先卻已往忽又還中有廟爾坪駐足尙安閒路傍北嶺腰身入白雲間陰雪積未消險絕令人嘆隴分東西郡元氣如龍蟠二十七日陰卯行西西南向順隴水三十里沙塘鋪烟火數十家十五里神林鋪程大令送至此備午餐送三關口詩而去午後西偏南

行三十五里東峽口寬僅丈餘水流曲折路在山腰隨之旋轉兩坡
獸蹄之跡如蛛網多穴孔大小不一豺狼所嗥也峽長七里緊鎖司
家川口出口勢漸開展卽靜甯州城隴水循河夾流出西峽口大山
環於外亦關要之地是日行九十里往靜甯州行台入城滿街結綵
數十步一橫懸似太尊敬無德當此媿負多矣接見者知州馮省三
景叅將李春林敬軒守備沙兆麟吏目宋壽恩千總白占魁等居民
十萬人仍嫌地廣再加五倍不足以盡地利本地不種棉無織布花
布皆自陝西來是以貧家兒女多不著袴亦牧民之責也靜甯州營
室分野禹貢雍州之域秦爲北地郡漢置阿陽縣屬漢陽郡以後或
屬安定或屬渭州皆平涼地也宋金置德順軍隴干縣元明改靜甯

州魏國公徐達率師至其地民衆歸附始隸平涼府地據蘭會之肩
通河隴之道前控秦嶺後扼蕭關城東五里東山宋吳麟遺子吳傑
據此山拒金人州北八里馬圈山宋二吳將軍牧馬處十里橫山舊
爲蕃部所居州西二十里拋龍川宋任福輕騎趨懷遠捺龍川卽此
地德順軍在州東南隴干縣漢番互市之地皆六盤山外

二十八日陰密雲不雨卯正出城西北行叅將樹兩營門於道弁兵
跪送門內官在門外向例也過硝河寬不及丈徒杠輿梁皆非難成
無人議及僅餘數人赤足貧丐候此負人渡河需索錢文亦惡習也
又過山河有小橋河西流注隴水會甯來水亦如之南流入于渭上
祁家大山高峻不及六盤而紆遠過之上陟峻坂下臨陡澗路傍山

行輾轉往復車一顛覆禍不可測土厚無石年久爲雨水冲刷槎枿
破碎崎零峭削無奇不有自平涼以西左公柳夾道斷續拳屈瘠薄
不如青白楊之條達肥美或西來土性宜楊不宜柳歟大山上下三
十里下嶺孫家溝有食物車店以西道漸平坦十五里高家堡尖馮
牧送至此備行台午飯有塘汎把總來接見長安以西城壘皆土築
壁立數十百年不傾頽居民皆穴處六盤山兩邊大石林立卽無穴
處之民靜甯州左右土厚如前又多窑洞少民房夫東南諸山依江
傍河石壁千仞聳插雲端從未見積土爲山下臨萬丈深潭峭壁如
削亘古不壞如秦嶺諸山者斯亦奇矣午後路平二十餘里至青石
嘴路傍北麓隨嶺上下或逼近岸側下懸深澗或轉入山腹竭人馮

之力始得搶上一坂澗水東流至靜甯州西入隴河歸于渭卽倒回溝也四十里至青家驛宿於行台會甯縣曾松樵憲清派人辦宿站入鞏昌界是日西北行九十里

青家驛行台全楚會館舊基李提督良穆等請改建行館又於迤東五里倒回溝修利濟橋長十二丈有奇寬三丈餘迤西三里尙家灣修履順橋長十六丈有奇寬二丈餘左文襄公刻石記其事碑在行館大門西偏

二十九日卯正西偏北行天已晴始知夜雨路滑輿夫數步一傾余換馬行二十餘里傍北山麓以山之凹凸爲路之曲折每當懸崖轉折橋常凌空心實惴惴而夫役駑劣時有傾跌方至路旁缺口下臨

深澗橋夫失足倒地雖未遭險已飽虛驚如是者屢次王陽畏途不足道也出青家驛卽大山川過陡嶺水東流倒回溝下嶺水西流歸黃河二十里餽餽鋪過橋卽閻王塢上有高山下臨陡澗路出山腰寬不及丈每遇風穴塌陷深不見底雨後泥滑人馬難行四十五里至翟家所均在山腰上行步步深澗行有戒心自靜州甯起人情之壞各省罕見性劣如牛馬得錢則思逃及強勉應差亦不得力曾令備行台午膳新學界也小精明而浮躁何以膺民社午後道路較好仍在山上行高窪崎嶇緊靠嶺側絕壁懸崖一落千丈下視澗水濁逾黃流漢之祖厲河也下游入黃二十里至張成堡土橋冲塌車行溝中數步一渡河河流繞曲路隨河轉夏日暑雨暴發人行其中往

往失事十八里上坡數爲上下七里至會甯縣宿於行台天色昏黑
大車上燈後始到車路在南山上自張成堡橋壞路亦冲塌單人尙
可往來車馬極難行地方置若罔聞餘事可知將出口南山豐隆浮
面一層土色糝白皮厚尺許內一層作絳色剝落處土紅如染斜入
河底桃華山也可知青白沙土高者數十丈皆洪水橫流時淤墊而
成下臨深澗上多風穴口小下闊深不見底人行其上心常惴惴昔
人云隴坂多風穴信不誣也是日山行七十二里澗底行十八里共
九十里

會寧井宿山谷紛歧川原繚繞東跨涇原南蔽秦隴西障金城北控
羌戎古稱用武之地歷代之重鎮也

會寧周西鄙秦非子封境始皇始置隴西郡漢置襄武縣後魏置烏
水縣又析烏水南置會寧縣西魏置會州後周移會州於鳴沙今中
衛縣隋復會寧縣屬平涼郡唐武德二年置西會州天寶改會寧郡
五代屬天雄節度使宋紹聖二年改西寧縣隸涇原路今平涼府元
符八年改隸熙河路紹興初陷於金金以西寧隸熙秦路定興初陷
於西夏天興初陷於元後併縣入州隸鞏昌路明復隋唐舊名屬鞏

昌府

三月初一日晴卯正行初向西北渡河者三繼轉西南大車順新道
溝河或左或右逢河則渡不計次數余乘肩輿走山上六十里西鞏
驛安定縣姚鴻軒大令鈞由撫番同知調署出郭來接備行館午膳

日方中車未到齊祇可就宿於此沿途童山無木生齒不繁耕牛瘦瘠無大牧羣貧弱至此非勞徠綏輯訓農通商何以善之惜無關懷民瘼者爲此根本之謀徒日模仿新政萬事皆墮壞於冥昧之中而不知救豈非天哉午後大風怒號車簾響動此兩日行程中或緣山陟嶺或過澗穿溝輿夫赤足渡河泥水盈尺一無橋梁夏日山水暴發旅行人馬常有覆溺之憂當道毫不經意吏治概可想見

初二日卯行出西鞏驛西門踰青嵐山山不甚峻盤旋上下山澗築橋路旁一碑名曰永定橋凡山橋皆用磚跨溝砌成圓門屯土其上厚常四五丈橋闌亦壘土爲之過橋上青嵐大嶺豐隆陡峻解兩車騾馬拽一車始得上費盡人馬之力十餘轉而至山巔上有村落數

家道旁穴居鬻乾饅茶水水皆冬日冰雪作深井窖之井深二丈餘掘土後以杵築之使堅墁泥一遍卽不滲漏土性然也地名山頭哈

度隴記云青嵐山頂名曰周家凹

去西鞏驛十五里爲青嵐最高處順山脊行一覽

衆山皆小山溝日久爲霖雨冲刷頽阜斷崖如人之肢體鱗碎身無完膚者然其上間有墾地畸零町畦皆隨山勢爲之十五里至東四十里鋪居民數家左公楊柳家如晨星存者柳茂於楊楊樹拳曲欹斜或山高氣寒爲風凌逼耳熟地無多每年春種秋收祇一季糧地以二畝半爲一垧麥收二三百斤餘僅豌豆燕麥玉米蕎麥等六七種地廣民惰是牧民者之責也十五里至青嵐塘有汛官士兵來接見共行四十五里作三十里姚鴻軒代覓一店地小無食物飭廚夫

作薄餅同人共食之午後順山梁行曲折盤旋下嶺卽安定縣城東西兩河夾流會於北東河水苦有橋梁牌樓西河水甘合流三百餘里至靖遠縣合會寧海城諸河同入於黃四山環抱兩水會流形勢頗好由塘汛到城三十里實有四十里連日行程多在山腰或峽底山行一經旋繞如作壁上行溝行則兩岸壁立如入釜底時防水患隴坂爲天下險惟身歷其境者始可與言自涇原以西數百千里山勢凶惡破碎絕少坦途用兵則喜其險治民則惡其凶每數百年一割據數十年一兵燹勢使然也當此民生凋弊患寡患貧全在招民移墾廣闢利源以期收效於十數年後耳六盤山爲涇渭分水嶺祁家大山爲黃渭分水嶺由此而西水皆入黃矣

安定縣漢屬隴西郡唐爲渭州西市貿馬之地五代淪於先零宋紹聖中涇原經略使章粝築安西通西定西三城屬通遠軍金大定中改爲安西縣屬鞏州貞祐中升爲定西州領安西通西二縣元因地震改安定州後爲呂顯所據明洪武元年徐達帥師至顯歸附改爲安定縣屬鞏昌府

國朝因之

宋盧秉知渭州遣將姚麟彭孫襲夏人於葫蘆川卽今縣北兩河交流處形似葫蘆又劉昌祚與姚麟率兵出葫蘆川敗夏人於磨礪隘在縣城北百里卽青石峽今名石峽口

明洪武三年徐達大敗元將王保保於安定城之沈兒峪口王保保

據蘭州攻安定徐達鄧愈馮勝湯和等初敗之於沈兒峪

縣北三里

大破

於車道峴

即今車道嶺縣北百里

王保保遠遁遂改今縣漢民回民積怨太深

不能出三十年不生事

初三日卯正行仍出東門過安定東河偕樂橋傍東山麓順葫蘆川北行三里中山壘一名福臺半依西山麓明徐達常遇春等與元將王保保相持於安定城北築壘能佔千人下屯萬騎遺址尙在東面尙餘長方台十數丈後人修文昌閣於上今已圯又三十里鋪河道刷至東山根路將塌陷囑姚鴻軒司馬從西岸裁灣取直翻土成堤即可保全萬里共行之路過此有土城居川中基高丈餘或安西舊城也又十里峴口鎮尖店極狹距安定城四十里河向北流路轉西

行午後過溝水上北山坡西行路甚寬二十里至秤鈎驛住行台姚司馬送至此備晚餐行館新修飾墁尙未乾潮氣甚大以火薰之是日計行六十里較昨日路近

初四日卯正行出秤溝驛上車道嶺初向西北繼西南又正北正南復西北盤旋嶺上五十里而至甘草鎮一名前路堡皋蘭縣陳三舟必淮楚產也辨宿站於此聞須兩日方能到蘭州日方午宿於行台初上嶺甚陡峻十里至大嵐嘴迷霧陰濃數步不見人直至下嶺霧未全銷明洪武初中山王徐達等大敗元將王保保於此嶺擒獲甚衆嶺長五十餘里寬不過數十丈祇有一路可通餘皆絕壁懸崖深溝窄澗洶用寡務險之地元兵長於騎射利在曠野平原而出此險

途雖衆無所用之況中山用兵如神宜其爲明兵所敗棄蘭州而西遁也行台四面環堞甚高內有一廟一營商民皆在牆外左文襄公督陝時湘人所建

初五日卯起連日陰雲四布午後方晴晚大風出甘草鎮北偏西行二十里渡河水淺沒脛至清水驛屬金縣界有土城南北兩門李春

甫大令

光山人

備尖站余入憩少許天尙早又行十數里至東屯堡曠

域忽開又十餘里遠矚西山根問之輿夫卽金縣也有興龍山在其西北古木叢蔚高薄雲表大者徑十數圍延袤數十里土人無力運出隴阪故樵採者稀入隴以來千里童山至此獨森森茂密別有天

地地脈漸腴去蘭州不遠矣五十里至金家崖日方過午卽住行台

李春甫欵治周備自甘草鎮至此七十里名大營川金縣來水名金川產砂金得名漢爲金城郡趙充國屯田於此今觀沿途渠水潺潺地便灌溉每半里許設水磨一座板屋五間置輪三日夜出麵千餘斤沿河堤岸年久冲刷積成碎石河灘築起方圍下留缺口承以塊石引濁河入其中清者外流濁者內淤一區水滿即從缺口流出入於下區下區水滿亦如之連引四五區再下則水清矣所壅淤泥一年可成田四五畝再接開下游如法爲之地成之後卽以其區之舊邊作爲渠垣石田變爲膏腴良法也直東沿河窪下之地皆可用此淤田之法惟提高流急恐有意外必須官家運石築埂建閘引水方保無虞或用蘭州黃河輪車車水最穩安金縣以北皆種秋麥柳黃

麥青風景一新與車道嶺東南數百里窮山劣水迥不同矣

初六日卯正起順大營川西北行過嶺俯視黃河一綫中流寬不盈

丈西偏南行有古長城土質堅韌秦蒙恬所築起臨洮至遼東今之

蘭州舊臨洮府治也蒙恬爲秦禦胡辟地數千里以河爲界壘石爲

城樹榆爲塞匈奴不敢飲馬於河厥功偉矣四十里東崗鎮

卽東關坡蘭

州府張祥麟炳華來接見與談尙明晰二十里至省城入東門長少

白制府率同現任司道等在官廳相迓慰勞甚懽住皇華館制軍旋

登門拜候迎入暢談內外政務及甘新鐵路事良久始去日晚未及

出

初七日夜雨路濘會客數十輩午後出門答拜制府並會藩臬兩司

皋蘭禹貢雍州之域周末爲西戎秦始辟隴西郡漢置金城郡其後或治允吾或治金城霍去病與匈奴戰於皋蘭山下山在城南四里以此得名隋始置蘭州歷代因之城北鎮遠橋金城關王保保城在焉黃河發源青海容納衆水迂折千餘里會於蘭州爲兩山所束東行二百餘里復瀉爲大渠北有賀蘭南有隴坂皋蘭龍尾九州元昊諸山對峙環繞阻河爲固山川形勢險扼金湯移三邊總督駐此控制西道最得形勝是日接晉兒電合寓安吉甚慰惟義善源閉歇有微累焉

初八日夜雨朝晴早會數客午後兩鐘往晤長少白制軍商籌邊事五鐘方回

初九日雨未行擬派頭幫車先發

初十日陰雨終日與甘藩陳岷山方伯商借新餉十萬兩帶往新疆
蘭州形勝

攷河隴之故地迺嬴秦之舊封近跨洮岷遠阻阿拉界接羌戎其山
聳拔地勢蜿蜒襟帶長城馬銜阻其東榆谷抵其西皋蘭峙其南黃
河經其北雖瀕遠中原而山川形勝固擬金湯關右一雄都也

十一日寅正起剪燭觀書雨後泥滑辰正始開齋早飯後答拜數客
畢出西門繞至五泉山傍龍尾古峯山麓多梨樹柔條茁蕊桃柳始
華春光宜人饒有江南風景路傍渠水皆五龍泉東西兩岩瀑布也
至皋蘭山中麓換馬徐行舊時金剛殿大雄殿輪藏殿東西僧院遺

址尙在回匪之亂皆燬於火紆折而上至大悲殿下馬步行入古佛殿清暉閣瀏覽甘露泉掬月泉摩子泉蒙泉惠泉諸勝西岩瀑布從巨石縫中流出出則翻花噴雪宛如銀蛇汨汨由西麓下東岩瀑布水勢尤盛白花長數丈水並甘美東泉逕穿寺西流合西岩瀑布折而東出山門前橋下東西有水磨二相傳霍去病與匈奴戰於皋蘭山下卓鞭泉出一名鞭撈泉下流灌園十餘頃紅泥岩水在其東色白而重所灌瓜蔬皆美烟草尤佳釀酒制醢味亦勝於他水凭欄遠眺會城在望大河繞其北再北則王保保城基址猶存西北山麓峻宇羅列金城關也上則九州台山形勢峻拔直上如台台上平原數頃可以望遠迤東元昊台山有級十數重相傳趙元昊攻阿干駐兵

於此山前廟宇鱗比北塔山也在鎮遠橋北拱抱金城如屏幃然明景泰間內監劉永成建白塔寺因以名山泉蘭山勢峻絕如眠弓環抱會城其東麓盡處一峯特起若斷還連岩望滿山也常置烽燧接東南埃火山環河抱結局緊嚴城東二十五里東關坡兩山束河爲水日細而曲東北流去眞陰陽蒼萃之區也惟西南北逼近山嶺火器精利之時非先佔優勢頗難爲守耳

十二日晴明無風早飯後出門參觀陳列所以皮革羊毛貨爲最佳左文襄督隴時購辦機器製造至今猶享其利其餘隴緞及瀟漆器具亦好惟價值太昂不易銷售須減價以廣招徠暢銷之後方能抵制洋貨收回利權又至工藝局卽貢院地基有織毛氈者用羊毛打

綫以棉綫爲經三人坐而織之厚分餘寬數尺佳品也所熟皮革亦佳毛革爲本地出產成本尙輕若能多製最有益織布有帶輪機較手頓機爲快惟無時新花樣餘藝多平常試驗場亦僅備數

十三日晴明長少白制軍及現任司道邀赴臥龍閣飲並聽戲二鼓回臥龍者左文襄祠之東偏院也公有老亮名故以號其閣閣甚閎敞匾對輝煌省城宴會多在此

十四日晴明午初往拜長少白制軍邀余游後園明肅藩故邸南有顏顧趙三烈妃祠墓在其西墓前有碑誌紀其事北逾小山則魚池亭樹景致幽然再北東碑洞有懷素米海岳董香光書鈐於壁甚精彩過此北出一門古長城也牆壁依然秦蒙恬督軍時所築由此登

望河樓樓依城垣爲之高出雲表下臨黃河河距城僅二丈餘石基
堅固故不壞西瞰鐵橋亘河上共五空長百餘步寬三丈許上敷橫
木車行其上年須更換金城關扼其西北塔山峙其北外有九州台
元昊台諸山東則王保保城望河樓對岸也西有翻水輪車掛城邊
引水入城樓懸左文襄題額大河前橫四字旁題一聯云積石導流
歸大海峒崆倚劍上重霄午後江安同鄉官招飲仍在臥龍閣少白
制軍江甯駐防亦作主人焉

十五日雨長少白制軍來答拜並送衣服卻之不恭祇好受之午後
邀赴督署飲餞回旋至江安會館答拜堯齋廉訪二鼓後始回寓
十六日陰令二幫車先行余候一日恐同行無住處也發京信三泫

函一料理行裝

十七日晴有風辰初出城司道候於官廳少白制軍隨後至談次殷勤託以迪化平忠襄公祠事揖別登輿過黃河鐵橋出金城關清理財政官傅衡堂秉鑒送於關門外談青海屯田法衡堂條陳也迺西數武六營將弁設載轅於道弁兵跪送路旁陋習也又西巡防營再西新練陸軍皆排隊送行十里保安堡堯齋與同鄉官備茶尖於廟中少坐行十里沙溝口塘又五里入溝初向西北繼轉東行數里右望山頂如房脊山麓如牆壁方圓光濯望之疑爲亭臺樓閣直如立柱大如洋房其缺處石柱雙峙又如碑樓孤立燧墩高聳礮堡羅列四面者然奇巧天成非人力也兩岸皆紅沙下有金礦水缺不易淘

挖耳四十里朱家井皋蘭縣備尖站於此午後北行至崖渠頭塘塘以南水入沙溝熟田甚少四無人煙山頂間有小圩墻煙火數家而已道順溝行尙平坦塘北過分水嶺坡甚陡峻西北行山多紅土三十里俞家灣住窮民百餘家荒店四五座草木皆無是日行七十里初出金城關河下繫兩船如墩船式傍有一輪問之士人船磨也安磨於船中上修板屋省卻開渠引水之費沿河大水皆可用此法亦巧思也

十八日晴冷卯正起初向西行繼轉北又西北順溝路尙平兩岸皆土山十里至樹崖塘又十里過土嶺逾通遠橋哈家嘴子產食鹽望之如霜雪山多紅土出硫磺下有礦人少地多瀟望荒蕪間有新開

種者童山無木多羊羣灘羊出寧夏河灘能容五千餘羊食灘草飲
河水臥於流沙之上故毛細而長又二十里鹹水河子平番縣境署
知縣楊光熊派差備尖站午後行初向北又西北過蔡家嶺漸有樹
莊浪河自平番西北來納衆水南入黃河灌田甚多三十里至紅城
驛居民五千餘家平番南第一鎮也農家祇種一季麥無秋糧山仍
積土無石不甚開洋是日行七十里

十九日晴冷卯正出紅城守備防軍送如禮傍莊浪河東山麓北偏
西行路旁渠水流聲潺潺水磨灌田皆賴此夾道楊樹高十餘丈左
公督陝時種植多爲奸民翦伐有未伐者高聳插天幹直無枝枝亦
被人斫去河灘石子彌漫皆山水冲刷年久厚積盈尺不能種植惟

東原地頗寬闊已敷居民耕耨道旁童稚往來多囚首垢面赤足無袴僅被破絮貧乏可想婦女纏足如驢蹏出常膝行垢膩不濯令人掩鼻而獨裹其足至不能行殊不可解有心世道者盍嚴禁之四十里至南大通尖有土城山至此稍開展北望遠山積雪一白祁連山也午後仍傍東麓行地高路窪居民村舍頗多三十里莊浪滿城亂後新築磚石尙整齊旗丁六七百名生計甚艱城守尉倭謁亭和京旗人帶同佐領弁兵等迓於城外入茶座略談數語興辭順道入城答禮而出望見北門樓上大書武當勝境四字城北里許有樓四層飛甍高聳南面有正度二字乃平番縣南高閣也又里許茶馬同知劉仲經秉權中營都司陳壽安延慶等出迎道左入南門上書河朔

重關城西南隅牆垣圯壞闕蕭條知縣因拔烟苗下鄉某副將查勘路線皆不在署從前官茶行銷番地茶商皆在此領票經狃亂後改歸蘭州道經理番子牧馬爲生不種糧食以馬爲糧設同知理其事故名茶馬同知番地產犛牛大於耕牛其毛長委地可爲纓本黃白色用茜草染紅來城市易茶布青菓歲以爲常現在番衆祇餘六七百戶土司領之世進文明劣種無以自存與美洲紅人等矣是日計行七十里天氣冷熱無常早晚均寒日出卽熱雲布卽雨或霏雪瓣遇風尤冷

平番縣井鬼分野入井五度古雍州之域周爲西戎地秦屬隴西郡

漢武帝置允吾縣

金城西四十里

屬金城郡本漢枝陽縣

距金城二百二十里

前涼張

氏置廣武郡後魏置廣武縣唐寶應間陷於吐蕃宋爲夏元昊所據元滅夏立莊浪縣屬永昌路明洪武五年宋國公馮勝平定河西改縣爲衛雍正三年設平番縣隸涼州府南接金城東控寧夏西援西寧北跨涼甘廣四百餘里袤三百餘里西南至紅古城西北至連城堡皆土司住牧之所扼制東西聯絡南北乃拊背盪吭之要區縣東地勢高寒禾稼不登南面山勢平低地燥土瘠多雨則豐少則歉惟西北大小川一帶土潤地饒每歲必穫

二十日陰卯正出平番城城守尉率旗佐等設茶座於城北送余行茶馬同知等又在北送如禮仍傍莊浪河東岸北偏西行高原低路十里馬廠溝東倚土牆明時防邊所築又西起鎮番東至寧夏橫築

四百餘里牆多傍山脚不如依山脊爲之得形勢也又數里十五里鋪居民寥落水冲石露河灘悉砂礫清流潺潺東山陡如屏風石色黝黑鐵礦畢露又十五里過河卽武勝堡把總張連魁帶老兵十餘名接於堡外西山砂石皆綠似有銅礦問之土人名雷廟山平番差人辦尖站午後傍河西山麓北偏西行逆風大作乘車行四十里大風雪從迎面來不可仰視從者衣襦皆冰又十里過山河至岔口驛住沿途兩山寬二里許中夾莊浪河舊渠甚多田已荒蕪有新開種者邊牆在其東河流至此已繞出邊牆外矣西望雪山卽祁連山也東北雪山又自烏稍嶺分支東趨是日行八十里

二十一日大風終宵天明晴冷西北風又作卯正西北行傍南山麓

邊牆在其右莊浪河又在邊牆之外沿途兩山夾峙中闊一二里近河皆土山無冰雪以外南北雪山峭石峻嶒北山差近山勢寬平雪尙易化南山如在目前實遠出八十里外積雪經年不化從近處山豁望之如白雲之麗青天峭壁槎枒無奇不備真奇觀也問之土人卽天山一名祁連山其脈遠自崑崙山分支東來至烏稍嶺西分爲南北二支北支東趨爲賀蘭山黃河以北正幹也南支自平番西鄙南下踰黃河脫砂變土爲隴阪諸險五十里鎮羌營尖涼州鎮標游擊駐此冉游擊成率千把總以下迎送皆如禮午後過莊浪河北邊牆亦改築於北山之麓由此北行十五里至烏稍嶺巔有韓湘子廟楊石泉督陝時禱雨有驗立碑記其事此嶺多怪風雪四季皆然行

者十遇八九昨晚大風雪今午過此日色晴明頗自慶幸入廟瞻拜
回望南山積雪太白混淪南下與北山相距百里一色相映烏稍嶺
腰係關內外通衢要隘西接祁連東控賀蘭南北開溝爲界以西番
界屬土司以東漢界屬州縣邊牆延東山直穿而過下嶺十五里安
遠營雪化濘泥車夫失足伏地車輪軋身而過幸無恙旱獭三五成
羣見人唧唧竄入穴又東北行十五里傍南山麓至龍溝堡有都司
駐此弁兵老弱不堪自烏稍嶺北水皆北流入鎮番海子以南南流
莊浪歸黃河是日計行九十五里實有一百里龍溝堡屬古莊浪縣
界署知縣李某託病未來派差辦宿站余駐行台命廚夫自炊食
二十二日晴有風卯初出堡門傍龍溝河西山麓東北行兩岸山勢

高厚雄渾沿途巨石林立中夾一溝寬不盈丈濁流激石怒號有聲
十五里黑松驛頽垣敗壁長逕數里想經獮亂破碎至此驛駐一汛
官帶老兵數名來接見又十里過石嶺西北行至二十里鋪破屋數
間道旁一碑大書關帝顯聖處由此傍河南岸依山西行東來一溝
入龍溝河邊牆高列北山上山勢雄渾逼河西折中寬數丈崎嶇峻
阻石子遍地極難行又數里十八里鋪遠望一巨石孤立色白如
雪近視之青石也被人敲剝徧體斑痕訛傳石能催生故行人鑿而
取之河隨山轉折而北行又數里十里鋪兩山夾峙一水中流寬不
容舫巨石阻水水聲怒號又十里古浪縣尖計行四十五里縣城緊
據山口口窄而曲外有關闌足資控禦西來山水入龍溝河繞城南

過地極險要山勢至此忽止分東西行城北高原平闊縱橫千餘里南引祁連雪水灌田到處水流潺潺浸溉不絕土沃物富儲糧養士之區南阻河朔重關北限瀚海大漠東有河套之饒西臨嘉峪之險西涼張氏呂氏據地稱雄數世於茲有以也午後北偏西行原高路下形如溝峽渠水順路北流草美羊肥三十里雙塔堡十五里大墩堡十五里靖邊驛住回望雪山如在目前相去已二百餘里矣是日計行一百五里接見游擊劉鑿盤作銘胡海芝立成武威縣盧義侶求古等

二十三日晴卯初北偏西行送者如禮渠水橫路數武一度河深沒脛余常舍肩輿乘馬而過聽轎夫自繞越之南望雪山宛然在目羣

山皆赤祁連獨白上無養氣故也他山高及天山雪際者亦有雪惟易化耳十數里黃渠下堡村民數十跪迎於道設棹一置紅棗兩盤中支木架手提茶榼酒壺余接而酌於地爲祝民和年豐也慰以好言而去又十里河東堡過大沙河寬數里石子滿地而無水道頗難行二十里大河驛武威縣盧大令辦尖站午後行過石子河數道河邊土坎遇水冲刷尙可砌石保護惜官不之問民亦懶不肯爲也三十里涼州住岳海豐鎮軍帶同游都守恩小泉都護帶同協佐領各官來迎陸軍防營旗兵分行列隊均尙可觀府同州縣亦接見焉旋出門答禮是日行七十里

涼州武威禹貢豬野又曰西戎秦爲小月氏後爲昆邪休屠所分據

霍去病出隴西擊敗匈奴至祁連山而還續置酒泉武威燉煌張掖

四郡武威屬縣十

姑臧武威張掖休屠博次
樽烏撲劉媪圍蒼松宜威

又置涼州刺史涼州之

名自此始竇融合金城五郡內附光武遙授爲涼州牧晉涼州刺史

張軌遣將北宮純入洛陽擊走漢王彌張寶又遣將入援至駿四世

忠於晉室駿子重華稱王二傳至祚屢遭弑亂駿少子天錫復弑元

覲自立是爲前涼秦苻堅滅之以梁熙爲刺史呂光殺熙自代是爲

後涼禿髮烏孤自稱西平王二傳至儁稱涼王自爲南涼安帝隆

安四年燉煌太守李暠自稱西涼公義熙十年沮渠蒙遜殺其君段

業自號涼州牧是爲北涼號爲五涼隋爲武威郡唐以李軌爲涼王

尋置涼州總管李大亮郭元振先後爲都督天寶元年分置隴右河

西二節度使五代回鶻據甘而涼將吏猶稱唐官梁以武靈節度兼領河西後唐涼州留後孫超遣將求旌節爲節度使漢涼州留後折逋嘉施請命爲節度周以申師厚爲涼州節度留其子東歸涼州遂絕於中國

宋太祖以丁惟清知涼州事領縣五眞宗咸平四年李繼遷陷西涼帝以西涼六谷首領潘羅支爲朔方節度仁宗明道四年夏元昊取銀夏涼肅沙瓜等地西涼不入中國職方者幾二百年元滅夏仍舊號後以城北三十里立永昌王爲永昌路設宣慰使司降府爲州而隸焉明宋國公馮勝定河西元涼國公搭搭北遁遂置衛及前後左右中五所崇禎末李闖置僞官

國初遣將剿賊甫入關全秦望風歸降以涼州屬甘肅鎮逆回丁國棟亂總督孟喬芳帥劉友元等討之棟西遁餘黨烏騰金據城肆殺友元設奇夜入南城殲賊衆城社始安雍正改衛爲府隸以武威鎮番永昌古浪平番五縣而武威附郭焉

二十四日晴暖卯正出城西北行文員在接官廳武員在外官廳旗營支帳棚旗綠防陸各軍列於道送者皆如禮沿途多土壩河流灌溉數百里可畊之地皆築壩以蓄之多渠以洩之河水皆自南山來如人之血脈貫通利賴甚溥塞北江南之喻良不虛也村多家自爲壘門小而垣高中修土樓高數丈亦有偏於一方或作門樓者相傳明時蒙古常犯邊以駱駝數十突來搶劫邊帥飭令家自爲守望寇

至則閉門升屋憑牆拒守樓則備瞭望便擊射也墮高不能入院有牆以禦之賊至無所得又有犄角之勢其法最良相習成風今雖南北一家烽火無警猶不忘舊制西寧開荒常被番衆搶劫尙可用之四十里鋪尖王仙舟盧義侶送至此午後仍向西北行天氣驟熱數步一渡河十里懷安驛換站馬十里隆昌堡十里豐樂驛住武威縣備行台沿途墩台極多凡過一驛皆有汛官帶老兵數名來接見疲癯已極必須裁汰但能簡練改爲巡警則要害之地仍有備耳國初征討西域規畫防守皆秉自

廟謨籌邊成法莫善於此洵不可輕議更張也

二十五日晴明卯正西西北行劉令國琦故人之子也署鎮番縣奔

走三百餘里來見告以作官爲民興利譬如商家作門面勿惜小費次及鄉情數語而去沿路石子瀾漫塞途車馬難行十里沙灘堡十里柔遠驛武威界止此十里九壩堡永昌界縣令李世材派差辦尖站南臨炭山北望蘇武等山路經山水渠流冲刷年久徧地碎石犖确大小不一若鐵路經此多用石子墊路工省且堅又無購地之費最相宜午後天氣熱仍西西北行十里清溪堡十里樂豐堡十里宣德堡十里通津堡十里眞景堡十里永昌縣行館住縣令湘人言語不甚通於訟事諸多不便沿途驛站多餘頽壁空無居人經猶亂後至今未能復元地廣人稀於此可見又乏賢令尹爲之勞來安輯何能有起色耶河西四郡爲西域根本後路如此前途可想永昌縣城

南臨照面山橫梁山北倚武當山金川峽山後則邊牆繞之牆外爲紅井腰峴馬跑泉青鹽池等處蓋南北多高山深壑東西爲萬里通衢饒沃之地多在山後附郭則地氣高寒祇收麥豆火蔴一季四鄉亦有攘竊馬牛之事地方廣袤六百餘里人丁四萬口征糧七千餘石留發兵糧向不折征亦不出糶東有九道壩渠水西北有大河並多山泉山環水繞地勢頗雄是日行九十里

永昌本戎落禹貢西戎卽敘是也秦穆公時爲小月氏國其後匈奴長休屠據之漢武時昆邪殺休屠以衆降卽休屠故地置鸞鳥縣隸武威郡後改名顯美晉仍之懷帝時依焉支山改置焉支縣屬武興郡

卽今高古城
山南五里

魏隋沿革不一唐於漢鸞鳥縣城置嘉麟縣開元間

置大斗軍

縣西四十里塔兒溝

天寶末陷於吐蕃宋興復舊景德間又爲夏元

昊所據僞置永州元滅夏置永昌路明置永昌衛

國朝雍正三年改永昌縣天山在縣南百八十里羌人呼天爲祁連故亦名祁連山霍嫫姚擊敗匈奴至此而還

鸞鳥山在縣西南百八十里相傳漢時有鸞棲其上故名亦以名縣又百五十里平羌山爲土番出入門戶又百四十里腦兒山腦兒華言水也三山銜接積雪融流耕者利之

金山在縣北二十里晉禿髮樹機能敗涼州刺史蘇愉於此後沮渠蒙遜亦屯軍此山出煤炭居民取以代薪

焉支山在縣西八十里匈奴歌云失我焉支山使我婦女無顏色此

山產藥材三十餘種大黃尤佳故亦名大黃山

二十六日卯正出城西行晴有風送者如禮夾道渠水汨汨自西而東源發於西山百餘里鸞鳥三山積雪融流居者永以爲利路多巨石摧輪絆馬崎嶇難行二十里至水磨關茅屋數椽餘皆破牆廢院一片荒涼沿途驛站類如斯洞亂平已數十年何至今尙未復元亦爲民上者之咎也南北高山中接平岡關鎖甚嚴下坡卽過河西北行清流數道卽大河口也水磨無多兩岸居民較稠西十數里一小山突起河中四面皆水問之土人忠山寺也其形如斗或卽唐之大斗軍歟過一村二十里至三道梁過梁平川碎石有明張將軍紀功碑未及撫視高岡平闊古戰場也十餘里方下坡又上坡行五里至

水泉堡住仍永昌界有守備帶同弁兵等來接見四面皆高山東南一大路西二十里巍峯積雪卽焉支山也周百二十里高古城在其南麓五里卽晉之焉支縣向晚西北風大作迎面塵土不見人計行六十里實有八十里大風竟夕

二十七日天曉風息卯正出城門西北行黃塵白霧一色混茫半里外不見人傍西山麓行邊牆在其東三十里定羌廟漢日勒縣故址在其南西去焉支山二十里繞行山東北兩面相距咫尺塵霧四塞山色在有無中豈匈奴婦女亦知自韜顏色耶山下四面皆平塲寬者數十里向爲產馬之區游牧饒富西南兩面水草尤美甘涼故道經焉出永昌水磨關順河西行經唐之大斗軍營之焉支縣西度紅

水入甘州道高古城卽爲支縣舊址迄今尙存都司駐焉中大道經其東北草場遼闊五十里至硤口營中皆平坦草能畜牧匈奴入寇動逾十數萬騎非得此地不能屯兵養馬爲南下西寧東出涼州之計戎馬馳騁用衆務夷之地也故霍去病攻取焉支山斷匈奴右臂匈奴卽失勢歌曰失我焉支山使我婦女無顏色正爲此耳若山丹硤口北山乃一夫當關之地非所語於匈奴之寇嫖姚之戰也據曹都司蘭云屢次獮亂皆先據此地搶馬掠硝爲出關要道進退皆易從河州來者又多先佔兩山營居硤中憑高擊下勢難爲守前朝守口將皆在兩山立營遺址尙在有以也初入硤口右山高聳從左山麓向北折東又折西北上坡嶺硤入城二十一年獮匪之亂據老弁

云城破守南門樓甕城得保全午後西北行東南風刮地揚塵日色
渾濁混沌未開蒙象也草灘高平四望無邊羊羣甚多數逾千頭無
水灌溉地皆荒蕪畜牧尙宜耳十五里王城舖窮民數家沙平草細
車行無聲以西漸有岡阜路尙寬平二十五里新河驛住始有渠水
灌田名溫泉壩五壩之一也水源皆自胭脂山西川來相傳禹導弱
水處攷禹貢導弱水至于合黎餘波入于流沙今山丹北長山土人
呼爲哦哩山卽合黎也水自山丹縣流經東樂張掖高台會諸河水
出邊入瀚海卽流沙也山丹令錫章來接見辦宿站是日計行九十
里路無水渠地無種植村莊亦少

焉支一山孤峙高聳周二百餘里產物甚饒水草尤美北卽八寶山

與硤口山相連夏秋草木蒙密產鹿茸野參麝香大黃等物上有百
花池方四百餘步

二十八日晴塵霧四塞日色渾白卯正西北行道平如砥兩旁地皆
膏腴亦有渠跡可尋惜多荒廢獮匪之亂民多逃亡地半無主招徠
安輯最爲要政無賢長官以爲之倡則州縣亦視若無覩矣十里三
十里舖居民十餘家十里二十里舖居民二十餘家十里十里舖居
民無多又十里山丹縣城渠水澄澹流聲潺潺穿西城而過沿渠列
市勢尙殷填渠水至西北隅又折而北流繞城而去街道甚寬無人
修理錫令人尙老實然未可語此入城至行台尖城卽隋唐刪丹舊
治縣志謂爲禹王導弱水處頗與經文相合午飯後出南門順渠西

行武營送如禮過山丹河河水東北流輻馬西北行十里大佛寺寺
依獅山東麓甚壯麗塑大佛高數丈居五層樓之中足踏下層而佛
頭在最上層裴子伯謙云頭大如五里烟墩真蠢物也余過之而未
嘗入視又五里十五里舖復過河山勢西轉河流隨之而西峯小而
秀路亦西行邊墻在其北以外草地屬蒙古矣終日烟霧至此始見
山五里二十里舖塵霾燥熱惟傍河多渠柳陰夾道水流潺潺景致
頗佳錫令送至此又五里大鐘廟東樂分縣界縣丞炳鈞來接又過
河河向西北流傍河南岸西行五里十里舖居民數十跪於道旁聞
吾過此特來叩首鑿其愚誠慰以好言而去馬雲亭鎮軍福祥派騎
隊來迎整齊爲甘軍冠甘州提軍馬雲卿立祥亦派巡捕差官來迎

皆接以禮是日住城裏行台分縣轄境東西各十五里南百里北十里民稠而地小故設縣丞治之糧賦詞訟皆歸丞自理亦糧廳例也攷甘涼兩府大水有三皆自天山北面積雪融流灌田千餘里農民賴之一古浪河合涼州西各壩水同歸武威縣北流入鎮番南海子又東北流入白亭海一永昌河自鸞鳥平羌腦兒三山雪水東流過永昌城北金川峽出邊入阿拉善王旗地之玉海一山丹河自祁連胭脂兩山雪水下注西北流經山丹東樂張掖高台撫彝等屬會紅水黑河洪河滔灑河諸水爲白河出長城入蒙古地兩大池皆入於流沙者也禹貢導弱水至於合黎餘波入於流沙按合黎卽山丹縣北長山似專指山丹河而言惟山丹河較長永昌古浪諸河皆小當

卽所謂餘波也三水同入於流沙則一耳雪水融流皆屬無源之水
或其力較弱於諸水歟

二十九日塵霾蔽日卯正出城西西北行車馬經過塵土冲天初出
溝路繼履平磧二十里夾字墩東西街數十家又十里過一渠有橋
至古城子尖卽仁壽堡也街市尙繁盛屬張掖縣界王聘初大令珍
來接見年力正強進士館畢業者尙爲有志之士同見者前甘州撫
彝通判顧其義典史張培榮也馬雲卿軍門加派把總五員囊鞬遠
迓亦太多禮矣午後西偏北行烟塵迷目二十里鋪綠樹陰翳村落
漸密頗有內地風又二十里過迎恩橋甘州行台住馬雲卿提戎立
祥馬雲亭鎮軍福祥等皆在接官廳列隊郊迎入行台具各畢旋出

答拜甘州地當孔道羌夷要衝河西咽喉西夏以山丹爲甘肅軍西
接撫彝古昭武蓼泉之故墟東出東樂臨松金山之舊壤在焉張掖
古劇郡漢魏以來有守有尉有屬國都尉晉魏有刺史元有行省行
台總管府明有巡撫總兵有行都司有五衛洵邊疆之重鎮也

甘州城內有霍將軍祠漢霍去病統兵破匈奴於祁連山下後人因
立祠祀之古居延關晉三關門明鐵門關皆在今山丹縣西北二十
五里龍首山口內古張掖塞在今撫彝廳北三十里羊台口走龍荒
道

三十日塵霧未開大風飛沙揚塵卯正出甘州西門西北行過兩橋
黑水河疏分數渠濁如黃流灌田甚多麥苗芘芘餘水流入大道漫

溢成小河行者有厲揭之苦又數里接官廳雲卿雲亭皆在此送余
行弁兵亦列隊相送茶敘數語別去坐車過黑河故道石灘寬十餘
里車行格磔二十里崖子堡漸有土路渠水交流樹亦茂密又過河
十里西城驛沙堆如土山相傳隋韓世龍守黑水國駐此有古堡四
去後一夕爲風沙所掠卽今沙山也又十里瞭望墩過河水深泥淖
亦名黑河數道分流相距數十里土人皆謂之黑水又十里沙井堡
張掖令辨尖站於此瞭望墩兩邊淤土厚丈許上覆碎砂石馬行其
上蹙蹙有聲種樹或相宜下皆土也村落多大樹聞之土人黑水發
源於祁連山積雪融流耕者築壩分渠引水灌田靠此以生數千年
如一日午後西北行數步一渡水渠村落較密大樹亦多十二里河

套堡又八里沙河堡乾河無水水分入田四五月間水稍旺撫彝廳張令學瀛派人辦宿站是日西北向計行七十里邊地多風塵沙漬面目色無光村民老幼面目驚黑婦人多纏足不耐久立皆跪地操作路傍多羊羣是日風極大子時息

張掖縣古雍州地秦屬月氏漢初陷於匈奴按周書西旅貢獒卽其地也月氏周末始大居敦煌祁連間有武威張掖酒泉數郡之地渾飲肉食隨畜轉徙與匈奴同俗控弦十萬匈奴王子冒頓嘗質於其國後逃歸弑父自立發兵大破月氏至老上單于殺月氏王以其頭爲飲器月氏懼西徙擊大夏居之餘衆不能去者保南山羗號小月氏自是爲匈奴右地匈奴部落曰昆邪王休屠王休屠分地武威昆

邪分地張掖至漢武時始入中國

漢霍去病過焉支山收休屠王祭天金人虜其太子昆邪王懼殺休屠王以其衆降分徙邊五郡故塞外因其俗爲屬國元鼎六年始置張掖郡治鱧得領縣十曰鱧得昭武刪丹氏池日勒屋蘭居延七縣今屬甘州曰驪軒番和顯美三縣今屬涼州初張騫欲招烏孫居昆邪故地以斷匈奴右臂烏孫不肯東遷乃分置四郡太初四年騎都尉李陵屯張掖天漢三年李陵出居延塞敗績沒於匈奴昭帝時始

屯田張掖

辛亥撫新記程

涇陽袁大化記

四月初一日早陰午晴有風霧卯正出沙河堡北偏西行地多鹵灘長十六七里寬數里瀰望斥鹵生鹵草無人居距灘地稍遠則樹木陰翳有渠地村莊焉冒風乘馬行二十里至廣屯堡換車十五里八寶山皆沙礫積成長八九十里寬五六里至十餘里不等卽古流沙也出土煤供炊爨過沙山至撫彝廳廳無城依舊堡爲之居民二百家合屬七萬人全藉黑河紅河兩水灌田雪水亦旺夏秋霖雨河水漲至六七尺卽禁行人須候落至三四尺乃用大輪牛車以渡張掖沙河撫彝三處河口皆如是往來者須識之以其常失事也計行四十里撫彝廳行台尖張令瀛學四川人明白事理年力亦強可造之

材甘省州縣之錚錚者午後塵霾氣燥西西北行始乘馬旋換車行十五里至雙泉堡又五里過河橋有草湖夏日村民多牧馬於此又十里渠口堡屯堡漸密樹木繁茂田皆有渠麥苗青葱間種稻棉亦能收穫又十里高台縣行台住將至縣郭夾道渠水潺潺白楊森秀有一種其高插天不發別枝自根至稍遍生細條蓬蓬矗上甘州尤多月夜望之如高塔然黑河潑其北合黎山包河之外流長數百里距道遠或數十里迴環如帶皆此河也接見李仁生大令應壽山左人尙明幹都司恩壽鹽局陳廷相肅州鎮道差帖來迎柴松亭鎮軍復送姓旗二面

張掖形勝

張國臂掖以通西域隔絕匈奴南羌斷匈奴右臂扼絕河津足以自守土壤肥美耕牧爲宜環以祁連合黎之山浸以居延鮮卑之水控制羌胡用武之地外通哈密內接關輔邊陲鎖鑰也

山丹形勝

甘浚鎮其右祁連峙其左兩山縈衛四澤泉充南扼青海之衝北拱居延之塞東控大斗西蔽流沙一郡之劇要也居雜羌戎地兼瘠鹵龍山高峙於丹城之北虎衛環拱於通衢之東

撫彝形勝

南控祁連北阻黑水扼懷城之要塞據蓼泉之衝衢

高台漢爲樂涇縣地屬酒泉郡晉因之前涼張氏置建康郡故城在

今縣西南四十里俗名駱駝城北涼段業建都於此尋爲元魏所有後周復置樂涇縣唐置福祿縣屬肅州又置建康軍屬張掖郡後陷於吐番宋爲西夏所據元屬甘州路總管府明宋國公馮勝平河西爲高台鎮因西有台子寺故名雍正三年改高台縣屬肅州直隸州形勝

祁連遠拱合黎近峙白城山屏其前黑水河遶於後自古屯田肄武控拒戎番之要地也泉水琮琤土壤膏沃今爲甘肅通驛要路筦三秦之鎖鑰控五郡之咽喉

初二日塵霧已午方見日其色昏蒙卯正出高台縣西城門北偏西行至八里堡又二里十里官橋又五里台子寺相傳爲西涼李嵩台

故址又五里宣化堡李令應壽等送至此夾道渠水縱橫分流麥隴青葱綠楊茂密沿途三五人家零星散處無大聚落無論貧富皆高其垣墉結廬於內非入門不能窺見室家黑河流於北合黎障其外西面沙山坡陀不斷兩旁多稻田言西北灌田之利者當以此處爲最多數千年來居民所利賴也又五里定遠堡村民十數人衣冠跪於道傍設茶座相款待謹受之慰以好言而去又五里楊達子堡又五里過山水河又十五里黑泉堡堡南里餘有三泉湧出資以灌溉故名高台縣派人辦尖站於此計行五十里午後塵霾燥熱北向行細沙平闊深陷馬足三里三里堡五里沙溝莊二里馬營湖左傍沙山右依草湖困臥車中一覺十數里又十里至花墻子堡轉向西北

行過清水溝橋又過濁水渠十里至紅寺坡有店一家寺居高阜垣與墩台皆紅土爲之車遠行而上沙坡微陷輪軸蹙蹙有聲頗費馬力如鳴沙然頂上寬平如砥叩之中空有音其下非石卽鑛也十里至地更坡下嶺又十里深溝堡居民七八家皆小本營生不務畊種草料食物遠購自數十里外接見把總姚文德天津人尙聰明外委安肅人兵十名皆疲弱不堪是日計行一百里若由黑泉西北直向深溝約近十餘里他日鐵道可由此綫修行

初三日陰霧卯正行西偏北向路多平坡結硝碱厚數分亦生草有泉中闊十餘里南北有土山十五里馬連堡居民兩三家又十五里鹽池堡鹽池距堡尙里許因乘馬往視東西長八九里南北寬二里

窄不及一里水深數尺及數寸不等夏秋之際烈日曝乾水自結鹽取之不竭若四面多開方池引水注之日晒成鹽並不費力大利也閱畢旋轡導者誤入泥淖馬陷而顛衣履皆濕午尖畢西行風沙撲面沙軟行遲溝深陷軸間有坦途而兩旁草地鹵重土鬆馬蹶沒入半尺許荒煙蔓草滿目蒼涼每行數十里四無人烟偶有樵薪行牧者亦不種地問其由來多云鹵重五穀不生實未嘗試種也過五墩台二十五里苦水堡烟戶數家又十五里過沙岡雙井堡住高台縣辦宿站於此堡駐把總一汛兵十五居民二十家打柴草牧牛羊爲生米麵草料遠運自肅州往返二百里民情官疲可見一斑連日天色陰晦午後微見日渾濁無光大風揚沙氣象慘黯殊不可解距大

道南二十里許皆番民散居游牧之所其小月氏之遺種歟

初四日晴霧未全消卯初西西北行十五里營兒堡居民數家兩距土山五六十里南遠而北近中夾荒原東西長約一百四十里地平如砥鞠爲茂草似經前人開種而歲久荒廢者地無水泉山水亦遠鹽池味鹹不能灌地開渠引灌較費工力故荒蕪至今安得賢有司招徠屯墾鑿井開渠遠引南山之水以興地利可增設一州縣過營兒堡西西南行五里界牌墩又五里蘆凹墩又十五里黃泥堡漸有人烟樹木引水種麥又十里郭家墩又五里紅柳灘又五里臨水堡水從祁連山來上有洪河壩卽洪水河也沿岸灌田樹木茂密南北數十里接連不絕居民衆多麥苗青翠別有天地似與纔過荒原饒

瘠不同矣午後燥熱正西行三里臨水河二里雙橋墩五里三十里墩十里馬道坊茶尖換衣西西南行十里十里墩五里紅橋墩又五里肅州行台住此四十里中渠水潺湲田園肥美每畝收糧四百斤少亦二三百斤地價在十兩上下文武各官接見如禮營兵不甚整齊接官廳卽酒泉故址左侯匾聯甚多前爲清勵樓後爲大方廳亭臺池塔清雅異常肅州鎮柴松亭洪山六安人關道廷浦雲棟知州恩裕如光皆京旂人是日計行一百里

初五日住塵蒙不見天日出答拜文武各官肅州城北河水灌地甚廣卽滔瀨河上游出滔瀨川寬百里至數十里長三百餘里唐時赴西域者嘗出此道柴松亭總戎曾派人查勘二十餘日方回據言河

流至城東北與臨水合經金塔廳名大白河出邊墻至將軍營與黑水合北過鷄心山大紅山至額濟納土爾扈特旗分入兩大池沒於流沙午後風沙大作鎮道招飲於松亭署中初鼓方回

初六日住陰雨竟日肅州南有祁連北據合黎西臨嘉峪滔瀨河橫貫其中引水灌田沃壤萬頃東有甘涼膏腴千數里以爲之後援第一形勝之區可戰可守之地宜慎選道府州縣幹練有爲之員招民實塞屯墾兼營以固新疆後路計無逾於此者惜乎猶未能也汛兵疲弱在城宜改巡警在堡宜分給荒地每兵百畝作爲屯兵於邊地當更有益晚晴出閱北城樓有後膛大炮三一尊廿四磅兩尊十八磅均能及遠左文襄攻肅州得勝砲也想凱旋時笨重不易運回留

鎮此關耳柴鎮軍派兵十數駐守憑檻遠眺西望嘉峪關紅山黑山
遙峙南北北瞻合黎鷄心諸山大白河貫其中南則祁連雪山橫亘
天末以限青海回望隴樹秦雲蒼茫無際驛路一綫蜿蜒山麓宛在
目前下樓出北門繞城而東長楊夾道垂柳拂堤春光入玉門矣東
北隅城垣高峻當同光間經官軍開掘地道火發城未崩裂從西南
面用炸砲轟塌一角蟻附緣登匪始不支傷亡甚衆出東關城門至
古酒泉登清勵樓有楊大意一聯中聖人之清有如此水取醉翁之
意以名吾亭語意甚佳樓上前後塑神像二樓之四隅古楊蕭森入
第二重門題古酒泉三大字內則澄鏡堂有恪靖侯題大地醍醐匾
額又聯云甘或如醴淡或如水無卽學佛有卽學仙皆佳構也院內

有花池植桃杏兩株後院有泉卽酒泉方八九尺四圍砌石多傾圯
水清見底遊魚逐隊泉眼半响一發如珍珠數掬北面細流入湖湖
北有亭亭北卽大湖有圩堤蘆葦叢生鳧鴨飛鳴莎草綠褥景色倍
佳惜墻垣傾塌無人顧問不勝今昔之感東院花園尙整齊花木無
多興盡而返入城經過白骨塔平列五座同光間攻克肅州戰亡將
士忠骸畢葬於此建塔其上以爲封識地方官春秋致祭奠慰忠魂
讀一將功成萬骨枯之句爲之慨然

初七日住雨止塵淨天朗氣清有人告予城南陳家花園花木甚多
結構都雅約往一遊是日轅騾病不食前腿兩腋摩穿車夫指爲因
熱所致牽騾執套驗之持足夾套騾不動匍匐若鳴冤狀疑車夫虐

待重責四百騾當夜食草如常牲畜亦有知耶凡吾騾馬沿路放開自走吾坐轎則跟轎坐車則跟車騎馬則跟馬雖值接送差時旗幟槍械雜沓喧闐而意態安閒一塵不驚犬馬識主有如此者午後鎮道先至花園候余余至金忠介公祠瞻拜公名順前伊犁將軍也祠爲柴總戎捐款所建棟宇輝煌聯額甚多次至左文襄公祠破垣斷壁瓦礫荒涼僅留正殿一所前有塑像後有神牌楊石泉題永鎮雄關四大字曾幾何時而廟貌頹敗至此閱畢出南門西折上坡入陳家花園園分三座花香撲鼻果木成圍過廳三間頗極幽雅穿花沿蹊東上凝香亭茗坐良久綠陰蔽日紅杏在林清娛宜人樂以忘倦眞佳境也廷浦雲觀察題有匾聯甚雅致夕陽斜照肩輿返城遣人

分贈鎮道書各數種餉車已發明日可就道矣

初八日晴風輕雲淡天氣甚佳卯正出肅州北門西西北行柴松亭
廷浦雲諸君先至關房送行余入座茗談而別四營將士設營門於
大路恭送如禮過大北河碎石滿地順滔瀨河灘行三十里過兩渠
渠岸卽丁家壩破屋數椽城守營設茶尖於此自此以西石子更巨
直抵關門而止塞外雨少全靠渠水灌田有餘則洩於道路每遇山
水暴發挾石而下溝渠四溢碎石成灘年久浮土冲刷淨盡卽成戈
壁肅州至嘉峪關七十里中一片石灘犖确難行者以此二十里安
遠塞守關遊擊雙祿等來見五里下腰墩五里上腰墩五里大沙河
五里嘉峪關行台佳關兵約有百名關建於山坡居高憑險橫扼通

循西南瞰青頭山口長城繞之北依牌樓山黑山障蔽其後南據紅山祁連高峙於前西有高坡如月城起伏數道深藏固閉誠天下第一雄關惟南北平坡寬約二十里黑山前後山溝自惠回堡直通金塔廳城紅山北麓順滔瀨河灘直至肅州北門雪山之陰亦有間道繞越遇有烽燧之警非大隊駐守難爲功明洪武二年建此關當時兵力僅至瓜沙伊吾以西非中國有以明祖開創之君徐常英略之將規模狹隘尙如此宜其再傳而後僅能畫關自守關以外悉沒於吐魯番矣我朝自乾隆三十一年後兩次重修關城一則爲準噶爾張格爾之亂一則爲馬四揚寵之叛皆恃此爲中外保障今則新疆孤懸塞外西逼英俄仍以此爲後路似不可不加意經營量移重鎮

以壯聲援也自此出關有宿站無尖站車馬多夜行晝息苦無所見
余則以子夜行明午憩止尙有半日得縱觀山川形勢庶不虛此行
耳

初九日子正起半句鐘出關門西西北行新月未落浮雲四起遙望
雪山形影微茫北斗辰星隱約可辨執燭夜行茫然無所見甚悶悶
也十五里大草灘五里二草灘十里黑山湖軍塘十里雙井堡天色
向曉紫雲橫天雙游擊祿先我至此備茶點其地舊有土城甚大居
民六十餘家淘金居多今則瓦礫荒涼水泉亦涸祇一汛官帶兵五
名駐此守護行旅過差防番衆出巢劫掠也南北山皆產金前曾開
挖近因無人停止余入其營上房三間廂房各一飲茶就道仍西西

北行兩山相距十餘里中夾平岡沙石鋪地內多草墩其外草灘寬
長頗宜行牧北面童山無木南則峻嶺插天積雪封頂層嵐疊嶂僅
露白頭上有浮雲籠罩蓬蓬如張蓋山腰霧靄蒼茫瘴氣迷濛日高
始散十里牌坊梁二十里紅山子十七里八里墩八里惠回堡居民
廿餘家黃草白沙中忽見綠樹數行堡南二里有惠泉流經村中清
澈甘美灌田三十里耕作百餘戶亂前堡多回民故名同治間攻破
嘉峪關城皆此堡回匪今已絕種堡名仍存南北山中金苗甚旺無
人開採堡東九十里曠無人烟宛成戈壁關西碎石堆積格磔難行
雙井西則細沙無石路尙寬平辰刻八鐘到堡計行九十里日色晴
明二幫軍將開行堡屬玉門縣轄據周令彝章云縣城南北四百餘

里東西三百餘里居民萬餘荒地甚多惟牧畜尙富饒

初十日晴寅初出惠回堡西北行東方微白三里二道溝四里七里墩高窪崎嶇數武過一溝嶺八里驢馬城相傳唐故壘也高原平闊與前不同北傍紅山南望雪嶺嶺下草灘寬長無人耕牧路旁鹼草叢生積沙成阜纍纍如塚長約五十里倘能遷民於此開渠引水荒場卽是膏腴由此西西北行十五里火燒溝白楊河經其左舊有渠今已廢夏秋水甚大十五里脖膝蓋子十里八楞墩十五里赤金湖甫行七十里草湖有泉命輿夫就泉飲馬余與僚友出餼糧分食之望見北山厯亂從後面繞出西南環抱有情南對大雪山萬峯來朝地勢頗佳迤南二十里柳陰銜接卽赤金堡也有都司住此石油溝

在其南出石油柳樹溝又在其南出金沙五六七三月開採餘時皆凍難以施工不知用木燒礮或揭開土皮見日自易開化赤金渠上游鴉兒河立閘分渠四道雪水渾濁至赤金峽漫溢成河西北流入花海子沿河灌田百有餘里楊柳成陰村居比連耕民千餘家大戶佔地窮者租佃荒地如此之多不能寬籌生計人少力薄故也午後西北行中有改向西西北者五里亂山子峯尖而小巒如楸坪碎沙隨水而去上多玻璃沙亦類金鑛沙車行有聲十五里甘店子八里魏家場七里峽口折偏西行五里赤金峽地險而要明成邊將士常追賊至此過河兩山砂石皆紫必有金鑛惜無人跡探都司武隆阿帶赤金汎千把來接見是日計行一百一十里申初到堡據電局

丈量實有百四十里

十一日密雲不見星光寅初出赤金峽城西北行入戈壁灘東西寬八十里南北長一百六十里碎石整砂年久牢結風吹不起車馬經之礫礫有聲行十餘里天始曉狂風大作車動鈴响如衆鼓齊鳴風聲聞之嗚嗚如萬馬奔騰肩輿難進換坐大車二十里地窩堡無居人武都司送至此十里紅土峽十里高見灘有石碣字跡皆剝落站房三間玉門縣周寶珊彝章備茶尖於此風急氣冷驅車前進灘平如砥不生草木惟枸杞叢密搖曳多姿積砂成堆四望平闊毫無障蔽故風來迅烈勢不可禦車馬當之其聲怒號已初出灘風亦漸息午初至玉門縣微見日光二十里三十里井又二十里鞏昌河卽疏

勒昌馬兩河由大壩分流過此灌田甚廣河之上游分東西二渠西渠口寬四尺下流入安西界東渠口寬丈六尺分灌玉門西境鞏昌河卽玉門之東渠也五里大東渠水流潺潺四望玉門縣行台住靖逆營遊擊康子青順年皖產也帶同弁兵等來接見是日計行九十里電局丈量實有一百二十里關內外風起多昏晦不辨人物風息始開霽常有數晝夜不見天日者殆盲風也

玉門縣

乾隆廿四年西域勘定拓地二萬餘里改靖逆赤金二衛爲玉門縣查靖逆今縣治赤金今縣東百里赤金峽也周末爲西戎地秦月支居之漢爲酒泉敦煌二郡地酒泉領縣曰玉門延壽漢罷玉門關屯

徙其民於瓜州之東也古延壽稽郡周時所據唐爲後陷於吐州肅州一力尼爲子印赤金等復理

本朝定鼎西夷內附康熙置靖逆同知屯田安民雍正改柳溝通判
爲靖逆廳領靖逆衛赤金所乾隆廢衛所改今縣

靖逆石峽東屏名川西帶北控右地南扼諸番

古玉門關在瓜州今安西州東雙塔堡

古陽關屬沙州今敦煌縣西兩站驛路是

赤金堡南八里紅山有古洞塑佛像殿宇山門鐘磬廊舍亭址宛然
爲一境之勝

縣東六十里共山出金名金山又古玉門縣北十里獨登山出鮮白
鹽名神兩山

十二日晦霾卯初出玉門縣城北門西北行城邊渠水交錯村樹茂

密田苗青青二里過西大橋卽西渠水康游擊等列隊送至此入戈壁灘長五十里寬約三十里碎石如指大鋪地青黑色右有渠地左望無邊盲風撲面迷霧四塞里許卽不辨物冷氣侵人灘上不生草木惟札蓬枸杞生焉數步或十數步一棵結子爲枸杞根爲地骨皮生於戈壁中者最佳余乘車行十八里白土窩十里西三十里井皆無居人渠水一道自西徂東橫穿戈壁迤北漸有村樹人家二十里三道溝住居民七十餘家余住一店房穿頂漏日土坑兩行踞而登之惟院闊尙可容車門前古楊數株大數圍百餘年物也河東玉門界河西卽安西界周令彝章送至此告以赤金湖東可開渠墾荒大興地利戈壁碎石整沙風吹不起皆山水暴雨冲刷年久土盡石存

不能生物桑田滄海理或然歟到店風息與昨日同適於道旁見農夫短褐懷一嬰兒首足畢露彼自有天倫之樂又見店前古樹巢鴉一巢數子嗷嗷待哺老鴉銜食喂之啞啞然如慈母之戀子足見天地好生之德人物同具此性也

三道溝今爲安西界西二十里柳溝驛康熙五十七年置爲安西玉門分界處舊設通判雍正六年移治布隆吉城乾隆二十四年廢衛改駐游擊後改都司今仍之河海崑崙錄云雍正十年勘定安西柳溝靖逆赤金諸處地畝屯田每歲籽種踏實堡千石布隆吉三百石雙塔堡三百餘石小灣堡卽小宛驛六七百石昌馬湖二千石靖逆赤金各數百石皆賴昌馬河水利按赤金有赤金渠流入花海子灌

地百餘里不賴昌馬河水雙塔堡卽漢唐之玉門關也

十三日早霾晚晴東風大急飛沙揚塵寅正出三道溝西北行渠水分流地多膏腴輿夫鞮履皆濕十里山水梁河寬半里已乾涸上游遇水決以灌田遇水漲時尙由此道十里四佳灘卽柳溝驛有都司來接見清流潺潺可灌田沿途鹼草叢生極爲茂密西人洋草帽辨卽此草所製大利也惜無人過問僅供炊爨十里六道溝有關帝廟泉清寬丈許兩岸土沃草肥無開荒者致成曠土十里七道溝古楊兩三株居民一家有水池由此西西南向又轉西北行平野無際荒草粘天高與馬齊十里八道溝徧生青草細水長流又十里九道溝有土橋蘆草滿塘曠無人烟實皆沃壤也二十里札馬營紅土堆如

高阜營址尙在野草蒙茸牛羊濺濺呼牧童訊之每牡牛一牝牛六
牡羊一牝羊五相爲匹偶則字畜孳繁可畊可牧之地而舉目荒涼
如此安得賢有司招民實邊爲國家盡一分心力培一分元氣綿一
分國祚也十里布隆吉城居民七十餘家古場甚多大者十餘圍皆
數百年前物城基寬廣舊有居民八百餘家同治間經回亂死亡殆
盡迄未復元有都司及千把外委數員駐之三道溝至布隆吉九十
里南北長百餘里沃野約七八萬頃足容十萬家有此美地而不知
殖民聽其麕聚腹省窮無立錐饑寒爲盜不死於凍餒卽死於兵刑
而邊境空虛無人過問徒供外人之侵奪惜哉或曰無水不可畊也
而疏勒河繞於北洪流滔滔汲引甚便何不於上游開渠以資蓄洩

乎或又曰無財不可理也然爲民興利辦一分卽收一分之益果能
實心任事勤加董勸則民不召而自來何患利之不興財之不阜凡
事皆然此其一端耳是日計程九十里四鐘行十一鐘半到均向西
西北行

十四日晴卯初出布隆吉城城大多空地渠水橫溢雍正間曾屯田
養兵於此昔年繁富之象今不可復追滿地碱草如二麥初熟一片
黃雲四望無際溝水涓流無所用之沃壤萬頃棄如石田良可惜也
四十里雙塔堡居民七家千總李正祥帶老兵數人來接見西面兩
山南北對峙中貫一河南山則雙塔矗立北山則一墩高聳中央則
疏勒河西流也望之如邊門大啓西則山寬三十餘里土名亂山子

卡房左近怪石巉岩細膩如玉山上沙石皆白如雪如鹽其沙可燒
玻璃又出金鑛漢置關於此玉門之名或有所取歟玉關以東沃野
百餘里南北倍之屯兵儲糧莫便於此惟山梁皆砂磧結成不產草
木路甚坦平車行其上蹙蹙有聲自雙塔堡起西南過小灣堡遙望
南山漸高大迤邐直至敦煌縣北界延長三百餘里爲胡騎東來一
大屏障斷難飛越南起陽關北至玉門西域出入之門戶也雙塔山
下卽疏勒河過河北岸有墩台一座其間砂山突起峯亂如墳寬約
二十里長城絡其腰背連平山高出數仞望之狀如城闕其色青黑
隱隱可辨南起嘉峪關西北至猩猩峽延袤千餘里砂磧遼闊寬至
二三百里寸草不生水泉亦少卽古瀚海土人謂之戈壁灘北爲

蒙古草地所以限中外也疏勒河口寬不及百丈大道出其南亂山擁之洵險要之區用武之地漢唐以來恃玉門爲外蔽有以哉今早出北城門西西北行又轉西西南西西北均之正西向行十里潘家莊渠水繞流田甚饒沃十里野蔴溝水流汨汨二十里雙塔堡過橋入店小憩噉茗西行五里道旁山有兩墩台西西南行童山無木起伏斷續絕無脈絡十五里卡房遍山皆白石朗朗如玉漢唐設關當在此地由此西西北行十五里出山又西行至沙棗園出沙棗沿溪多紅柳性堅而拳曲難長大二里渠口塘五里趙家莊中渠五里小灣堡卽小宛驛有汛官駐此居民廿家耕戶散處者三十餘家除河水灌及之地餘荒尙多堡地寬十餘里南阻大山北瀕長河前臨戈

壁近河兩旁水草甘美鹼草尤多牛羊成羣馬驢次之入其堡綠楊夾道古樹經圍誰謂春風不度玉門耶產甘草大盈握樵夫剔枝供薪而留其根根卽甘草也用蜜漬之可多食否則恐患鼻衄是日計行九十里四鐘半啓行十二鐘到堡住山嵐霧靄瘴氣未消安西州北西兩面多戈壁祇東南一帶可耕種荒曠無人州官尸位深居地方安望有起色

十五日晴卯初出小灣堡西西南行五里王家莊五里楊家莊紅柳成林溝渠交錯地質肥美草木蒙茸山勢至此漸遠夾道甘草成叢從者連根拔之長尺餘粗經寸產此藥者祇附近四站餘皆無之十三里南工渠過黃渠橋水寬丈餘來勢汨汨灌地甚廣而沿渠之地

平之所西須唐見千改諮

密致巴里坤李鎮軍電囑將馬羣趕至頭水溝三十里店達坂大石頭等處草場牧放屆時順道往閱聞州城樓下有井一口土人呼爲神泉古淵泉也步行往觀其井四角方木檻圍之建石椿高數尺上一柱直通樓底兩木龍張口蜿蜒繞柱而下似欲入井吸水者樓底亦作四分形井口寬尺許四周砌以磚石水深兩丈餘從者汲一笮笮回寓煮茗飲之味極清冽塞外得此亦甘露也州城南五里同治間新築一城迄今未能竣工白沙屯壅高與城齊十餘里卽望見焉是日計行七十里四鐘半行十二鐘到夜半一廚夫臥於行館東北廂夢魘而號同臥兩人呼之不應旋亦隨之而號他室中人羣起往視衆聲喧囂鬩動一院緣聞此寓有鬼因疑生畏因畏生魔遂羣信

真有鬼矣積假成真事所常有爲之一笑

十六日晴子正卽驚覺而起寅初出安西北門北偏西行副將張其高及都司電局委員等送如禮五里過疏勒河水寬二丈許聞封凍開凍時水極大龍王廟在其北天未曉過沙灘車行有聲二十里地窩堡曠無居人四面皆大戈壁地勢漸高沙石青黑遠望水氣濛濛不生草木深闊無際其平如砥安西南山如在目中山石受日力久色多變黑而白者愈白理有不解三十五里石窰子窩棚一石窰一協兵聶天仁年六十餘駐於此長帥過此因沙磧百里中常有饑渴凍餒死者置腰站派老兵守之備柴火茶水以濟行人月給麥二斗五升銀九錢安西協營將欲裁撤聶來跪求邀恩錄名記之沿途戈

壁中漸有高隴低灘由此北行小山紛起巨石豁露車行蕩簸三十里白墩子住所過高阜崎嶇上下難行雖沙石仍前而平坦不如遠甚此地有居民十數家山泉涓涓流溢道旁土人不知引以灌地除當兵開店外別無生涯侯令派差辦宿站店中黑暗如漆四壁滲漏如處露天中從者無栖止處求一席之地而不可得汎官衣服藍縷如聾如瞶不生萬物天地之窮也不儲衣糧人類之窮也天人交困莫過於此是日計行九十里實百三十里三鐘行十一鐘半到十七日晴卯正出白墩子初北偏西行轉西北行將至紅柳園又北偏西行白墩子北一里許有草灘長數里可耕種沿途小山凌亂無序路多白沙馬牙石線甚多硫磺氣盛童山無木必有金鑛十里金

窩子十里亂山子卽二十里堡又十里黑戈壁梁綠沙黑石銅鐵諸苗畢見十里小紅柳園十五里大山口過平嶺道坦闊十五里紅柳園住居民八家不耕不種山梁至此漸高青黑砂蓋面山與平道皆然安西州侯葆文所派差不知何往店中土坑無席糞土滿屋余出關以來惟恐騷擾諸多從簡一餐不肯受人至此適如吾意耳午初到店大風忽作是日計行七十里地有清泉行者賴之士人不知引以灌田殊可太息昨有新疆知縣閣緒昌遞稟代訴奇台縣童淦等冤殺客民數百命飭提解遞徐四等六人訊之

十八日晴卯初北偏西行遙望亂山層疊砂石鋪地草木不生惟路尙寬坦枸杞徧生山窪處望之纍纍如黃羊大山過盡小山漸平每

十餘里有沙梁一道自西而東中平如砥純沙無土小泉有草場道旁頽垣四堞惜泉水小不足以灌溉行數十里有山無樹終日不見人踪可謂乾淨世界紅柳山四圍如園中闊十餘里行過數里復如是無村落人家亦無耕地沙灘小柳叢生自成圍形所謂紅柳園者殆指此出紅柳園五里咬牙溝十五里紅沙灘十里亂山窩舖十里青沙灘十里小泉十里石照子皆無人烟二十里大泉住居民十數家有汛官駐此泉水較旺亦不種地仍安西州界

十九日卯初出大泉北偏東行每過一小嶺中間地平如砥四面闊約十餘里山皆環抱望之如堵墻二十里炭山子產煤炭無人採用十里亂山子十里腰站子有破屋數間基址尙在皆無人居十五里

大山頭東麓出玉石滿地皆是大者如斗小亦如拳潔白透光由此北偏西行十五里馬連井住居民一家有汛官汛兵開三店草灘周數十里甚茂密出藥材鎖陽大如藕不種地謂無水不牧畜謂多狼人少而懶可見一斑是日行七十里路較近仍安西轄明日卽入新疆界矣

二十日晴卯初出馬連井西北行過河灘十里墩有石坎數道自西而東寬數尺陡起如門坎過坎道始平山溝產金砂凡出金之溝山脚斗拔或攔溝有石坎聚沙必多二十里金窩子舊有金夫窩棚故名其地四面高如城垣中窪如釜底氣之所聚金苗必旺聞此地有線金有沙金每過一坎高下成窩形寬里許窄半里或數十丈愈北

愈寬阜亦漸高有至三四丈者惟水泉極缺若於草厚處掘深當有
泉出惜無人知之耳十里腰站子頽垣數間無人居七里紅土嶺甘
新兩省交界處立有界碑其峽土色如丹歷年雨水冲刷尖圓方斜
形皆備中隔一川寬平多枸杞三里油神廟山環路曲崎嶇難行五
里咬牙溝下山路平坦五里臥牛灘紅土坎陡起高丈許上平如砥
十五里峽口哈密王派差持帖來迓沿途備茶尖廳官李源鈞都司
鍾祥勝接至此兩山皆整石形勢雄厚隱隱露金線痕亦產煤甘草
大黃枸杞等藥生焉好事者於山腰用塊石堆垛成人形遍山多是
行旅過此輒仿爲之殆祈禳之意也五里猩猩峽有把總一員兼帶
巡防馬隊一棚駐紮稽查出峽來迓初入峽口細雨廉纖旣而開朗

晴曦忽放浮雲乍斂亦佳象也居民三家各開設小店以待過客有郵政局一所峽口建關帝廟甚靈驗草料皆自沁城來回王派送照章給價是日行八十里峽內多馬牙線深入石罅滿山細沙糝白如嚴霜金線寬約五十里大山頭與猩猩峽南北相望中間數十里勢低平而起伏高下環迴相抱結成圓形自紅柳園以北山形皆然惟較彼較寬闊而此則緊圓耳

二十一日晴明有風揚塵迷目寅正出猩猩峽西北行上坡巨石一塊方長數丈如一整石無斷裂痕其平如砥八里大坂關帝廟荷戈記程云峽西有魍魎築廟於此邪魔始遠遁余入廟瞻拜區聯滿廡廊繞廟左出峽下坡陡峻從前往往失事自立廟後屢經開鑿修墊

始免蹉虞峽底東西皆平川順川西行南北山麓煤苗呈露川底亦然長數十里儼成煤山拾取數小塊燃火卽着地僻人少雖有佳煤無所用之鐵路一通其利必溥峽中純石無土寸草不生青黃赤黑白五色皆備硫磺氣極盛蘊結最久礦產之旺可想見矣十二里亂山子煤苗顯露於外北高而南長者一道黑線東西穿峽而過十里亂房墻出峽口南北多沙石山勢漸小路亦寬平過數坡環抱成圓形皆出金鑛二十里腰站子又名小紅柳園有官房一所道士守之月給八金有井一口掘地兩仞及泉水旺且甘有草灘三四頃可墾種若能鑿井十眼可安三四家使畊種自給兼開小店行人尖宿皆便勝道士看守遠矣以告哈密廳李源鈞爲之有難色擬自行派

人經理之回王設帳房備茶尖於此帳上圓內方陳設華美紅氍毹敷地置棗餌几上執禮甚恭由此西北行二十里河壩又西行過山坡山勢十數里一環抱中開大陽藏風聚氣礦產甚豐二十里沙泉子住有泉流於地居民亦種菜蔬若加濬鑿水源必旺有旅店三官店一驛站一郵兵三名水味鹹苦道光間有居民數十家而今亡矣自安西至此多沙石不生草木由硫磺多氣猛味烈植物質弱不能長養戈壁漬於水童山成於火理或然歟是日行九十里

早發猩猩峽峽長四十里純石無土體勢雄厚關帝廟居峽之陽相傳峽後有魍魅築廟於此邪魔遂遁幾有人施二馬於廟一馬入山每朔望一至後不知所之一馬常入人家與廐馬同槽食馬至則其

家必祥入以爲神樂餉之今馬已不見車夫過廟前必捐草料少許以祈神馬廟僧亦藉以自利焉

口號

天開隘口幾千秋坐鎮雄關有漢侯破曉初昇東海日一彎殘月落山頭

二十二日晴寅正西北行過草灘北望白石頭山甚高峻積雪長白北通巴里坤天山尾閭也距此百餘里曰沁城回民耕作數百家十五里亂山子二十里腰店子一名鹹泉又名疙瘡井水味鹹舊有兩店今無存惟官房一所使僧守之月給八金回王派人設茶尖於此乘馬行二十里大坡二十五里苦水驛有店三小舖一郵卒三名是

日行八十里寅初行已正到沿途童山戈壁不見草木多鳴沙水鹹而苦宜開井爲先務地方官闡茸無能言之何益擬派人鑿井築室招民屯種兼設旅店以便行人爲入手辦法苦水驛井深一丈三尺寬三尺餘常有七尺水湧溢井中據此推測是離地平六尺卽得水再深更佳井底宜用塊石砌墊以防沙滲宜石高四尺有罅能透泉眼以上木爲之多鑿數井加寬六尺深兩丈能用輪車或轆轤戽水則不可勝用矣舊開一井用七十工木植由哈密來約需銀四十兩尙不甚昂若加開寬深則工稍多耳

二十三日早陰霾旋放晴曦二鐘半出苦水驛西北行天氣昏黑燃燭照之沿路倒斃駝馬驢甚多棄置道旁無人顧問爲野獸膏吻白

骨狼藉觸目皆是由距站道太遠水草中絕負載過重車夫惡劣動輒鞭撻以致倒斃頻仍何日接軌關隴以便交通使此蠢物蒙福哉自此平坡沙路寬平無阻車行有聲飛塵迷目十五里石窰子天已大曉乘馬行二十五里蒙古包土坯爲之如牛皮帳方幄露頂圓孔大如碟凡過往行人如遇日暮途遠或風雪晦暝寒冷借此爲躲避處所旁一巨石方丈許高數尺前豎紅石碑標明南至苦水北至腰店各四十里無水余下馬步勘東北百餘步外青稞茂密下必有泉用石爲標記預備開井又十里甫上坡察視兩溝會合處泉水尤旺坡下產金馬牙石多而潤有水方可作三十里天生墩紅土高出六七丈自遠眺望如烽台一座故名十里腰店子官房一所以道士守

之沙阜無泉水北行三里許白沙山左東對方台有兩小溝中間水草繁滋下有泉降輿指示之十里五十里井子有土屋石碑後有兩井無水深七尺以木圍之兩邊皆有水閘井時誤鑿石骨上故不及泉三十里紅山子土人設蒙古包於此兩阜土色如丹過一川一岡平如砥上面純是青石子如指大遠望深黑似水近卽之陽氣浮動又如水銀鋪地二十里過二工河舊渠道也格子烟墩在其中多可耕之土惜渠壩湮廢水泉不到背倚平岡紅土剝落氣象深秀卽驛站也是處有兩店一小鋪電工頭一名郵兵五名如築壩開渠引水灌田可安百餘烟戶沿途戈壁中多金礦未能開採西北一帶寶藏甚富天必待異人挺生而菁華斯洩歟門外墩三井一井深八尺寬

三尺許積水常三四尺院中兩井深八尺餘寬約二尺常儲二尺水每井僅費十餘金是日計行一百四十里寅初行午正到哈密屯田三十五石駐兵四十名守備一員把總一員在北山天然圈南引雪山水灌之一名八大石山上通巴里坤卽天山也每石加四倍收糧百四十石兵留食一石扣銀三兩五錢除留籽種外餘悉交公家此法極宜推行於荒多人少之地聞光緒初年左文襄進兵新疆因水草不便從三道溝橋灣營出邊走蒙古草地入黃蘆岡進剿省城未嘗經安西哈密間戈壁最爲得計否則大軍一出此途水草俱無卽無前敵阻撓人馬飢渴而死者必多至今三十餘年謀國者尙未將後路開通誠大恨事現擬先濬水源爲入手辦法

二十四日晴明有風寅正出格子烟墩西北行上坡五里大沙梁平坦如夷過岡川四十里腰站子有泉沙回王設帳房備茶尖於此執禮如前一片草墩茫無涯際水脈甚長五里碱灘有水可耕種碱不甚多五里哈家園子草場有牛羊羣土沃草肥可殖民鑿井引泉亦可灌地五里長流水住有泉眼五一眼水源獨旺汨汨其來土人於泉旁築兩池水色清美上池可供汲飲下池淘洗各物汗流洩於外成大池澆園地余派把總袁祿雇工大加濬鑿以暢其流足資灌溉然後招民屯墾事半功倍也連日所至水源稀少不敷應用今則有餘矣地生胡桐樹大徑六七尺枝葉如棠梨根下如柳邊地特產也餘樹亦繁茂白桑樹大數圍關帝廟居其上過廳中井泉深丈許味

甘而冽余閱視一週足可灌數頃地出安西九日不見樹木今則風景頓異回王送柴草各兩車雞羊各四隻分賞從行者有把總兼馬隊噴長某余囑其用餘水種菜居民十家店五家兩家兼種園地一家專養牛五十頭小舖三家一家兼牧羊一家專種菜馬兵十名郵兵三名是日寅正行已初到行七十里而弱晚風急

二十五日晴寅正西北行地平可耕出甘草水脈亦淺二十里腰站空房場一間有兩泉北二里許有方泉寬丈餘深亦如之四面皆鹽場長十里寬二里結成鹽厚不滿尺性輕鬆年久風沙積厚土皮數寸掩蓋其上質礪而虛一踏卽陷掘之卽鹽塊惟帶城氣尙有雜質一加煎熬卽成純鹽亦利源也二十里腰站子草厚土肥水泉亦多

沙親王設茶尖於此帳中鋪毡蟻穴在其下土皮盡濕水氣上升當有泉水北距大渠三十里地平如砥可以開渠引水先在此鑿井築室招民居住種地設店以便行人二十八里大泉灣漢民五家園民三家種地十六石三石一頃牛四十羊三百馬二十四匹二里卽黃蘆岡驛也居民十三家前有大渠種地八石馬十五牛四十羊二百計車店四小舖五農家四電工一郵兵三周副將沙親王來接見此七十里中良田萬頃可殖民數千家八大石山雪水倘不敷用可多鑿井池濟以輪車居民當不謀而聚爲省城後路關係甚重宜先從招民墾荒入手爲根本之謀富強可驟致也哈密纏民一千九百五十戶男女兩萬人漢民無多行台外雀聲燕語鷄犬相聞蕃庶頗似內地此

間水泉甚淺掘下三四尺即可屏水灌田五月以後水源易竭非深至丈餘不得水故鑿井必須兩丈深八大石山雪水甚多回民多傍山種地常年水流潺潺以外隔沙窩十里戈壁十餘里沙水不分不能引灌宜設法疏通此渠方能大得水利

二十六日晴寅初西西北行土肥草盛旱蘆尤多十五里一顆樹有美泉灌地耕民賴之纏民三十六家漢民三家兩家開店牛六十馬八十羊八百餘頗富饒惟北山雪水中隔沙窩戈壁三十餘里必須設法開通用濁水浸灌以彌其底多植樹鋪石以固其幫如沙親王之新莊長渠方能永享利益開闢沃壤長流水黃蘆岡百里之地足養十數萬人聞八門洞圍山諸塘皆唐尉遲敬德監工大石砌成堅

牢無比興利實邊之策無古今一也十五里戈壁頭無草木沙親王設帳備茶尖於此二十里新莊子渠長百餘里兩岸綠楊環繞渠極堅固漢民三十家各種百畝地餘皆纏民十里柴湖廟村戶比連綠樹垂陰小學生廿餘跪迎於道性頗純良悉以好言慰勉十里哈密漢伊吾國城以上爲之溝渠縱橫樹林深茂回城在其南里餘風景尤佳綠陰夾道清流貫其中水聲潺潺草木暢茂周麗生協戎得金榮華甫廉訪需巴里坤鎮李克常等均在城東接官廳哈密沙親王亦張幕於此接見如禮防營步隊稍腐敗城內外小學十堂教員學生以次見於行台學童面目俊秀語言清亮沙親王自設漢文學堂四學生僅百名纏生較多八九齡皆能通漢語漢文將來畢業分布

南疆作纏民教習十年之內回疆皆通漢文語言教化既同民志自固所關非淺鮮也

二十七日晴東風大作沙塵迷目卯初出哈密過回城西行三里回王塚台高兩丈餘綠色圓頂繚以垣牆寬約十餘丈門北向回王歲時致祭者也十七里屹塔纏民一家路旁有泉水土脈肥厚二十里西一顆樹古樹一無居民泉水頗多足可墾地二十里五屯河壩多淺溝有水草北距天山百餘里望之宛在目前積雪封頂六月猶白山北巴里坤今之鎮西廳也天氣較他處尤寒四月朔尙下雪尺餘渠水汪洋可卜豐年山南哈密廳天甚熱今午汗流浹衣十里頭堡纏民十八家漢民開兩店一鋪一木作郵兵二名是日行七十里沙

親王送至此與之商辦八門洞大渠直至長流水西腰站子分灌黃
蘆岡長流水百里之地卽請沙親王監修用款若干我與王分任之
由地戶分十年繳還墊本另濬他渠此間宜作十字形爲正渠分開
支渠引流灌地或一正渠下分四道子渠亦可

二十八日晴寅正出頭堡西北行土地饒沃有泉無渠土人不知開
井故多荒塲沙親王設幕道左余與之入座茗談良久北山五道溝
水極大能灌百餘里地惟出山十里卽入大石塘四里又經戈壁灘
自此不復見水曾派人查勘無可開濬幸地勢北高南下擬用坎井
法從水入沙石處兩邊作剪刀形上張下合三五丈鑿一井再由井
水二尺下開暗渠自下而上以洩井水引入明渠卽可灌地吐魯番

附近多此法林文忠曾仿而行之二十里二堡有大泉村樹濛籠居民十餘家有客店二可留宿二十里大沙坡泉水尙大西行十里大墩泉水旺又西西北行五里白楊溝農民引渠水種地五里三堡住漢民十家回民四家車店飯館小店備羊千餘纏民三十一家種地四十五石牛馬數十羊千六百餘頭有郵兵電工

二十九日晴有風寅正出三堡西北行十里柳樹泉有渠水迴繞村樹銜接過此以西戈壁灘天山雪水北來沖刷年久已成沙磧約寬五十里十里路北二里餘羊浦那居民一家三十五里路北二十里許沙棗泉道旁有農戶一哈密王駝水設茶尖於沙灘帳房方如屋九柱八椽一圍布一頂布四角鐵椿留繩備土地平曠四無草木亦

無泉水十五里三道嶺子上坡二里許有大泉漢民五家四店一鋪
回民兩家一店一館纏民一家種地六石牛四頭馬四匹是日計行
七十里

五月初一日晴有風寅初出三道嶺北偏西行戈壁灘路寬平十五
里鴨子泉纏民一家有水草種地數石南二十里磨子石有回王煤
窰由此西行又西北行三十五里七子泉漢民一家種地六石有大
泉一小泉六七加濬寬深可灌田地兩頃西西南行五里駱駝場有
泉水五里沙墩子纏民一家有水草三十里瞭墩驛此四十里中岡
阜忽高忽下碎石鋪地崎嶇難行瞭墩王榮貴開坎井長四十丈每
間兩丈一井深丈餘內開暗渠高四尺寬尺八寸僱纏工每開二丈

價銀三兩連井在內濬出大泉流入池方數丈灌地數石以外荒地尙多漢民九家纏民一家店舖藥店備牛羊八十餘有稅卡王守備帶後路馬隊駐此多空額郵兵三電工一是日計行九十里

初二日晴有雲早二鐘行初西北繼西南又西北又北偏西行均之西北向山旱起伏陵谷高低碎石鋪面阻礙難行車甚簸蕩馬亦裹足四十里鹹泉路北半里許水尙美哈密王設茶尖於此到時已卯初將出哈密界王差由此回余乘馬西北行北臨天山山水冲刷年久高窪盡成石灘行人苦之又西行一椀泉驛祇一泉深四尺水不敷用驛東面多泉土人不知掘取擬在西偏溝口加開一井以濟之尖後已刻西行傍天山南麓出南北山頭間路平如砥轉而西北行

左傍石岩長數十里形勢雄厚不甚高整山一石宛似架山一座東北向多風窩大如斗或如升一石倒插窩中懸於空下多石縫長數丈寬尺許每值北風緊急空響谷應飛沙刺面而天朗氣清雲翳一片寒冷如三冬重棉不足以禦之北路天山高峻雲氣沸騰瀰滿山腰諸峯隱現靡常望之如海外蓬萊時沒時露奇景畢肖一椀泉北天山則又忽焉在後矣西南諸山高插天際一氣銜接東麓石骨高露紆折迴環幾如天生城中平如砥四山環繞峯巒聳立蓋天地磅礴之氣蘊之深而蓄之厚始發現奇形下必有極旺金礦煤鐵礦徧生於天山之陽早間取有礦石多種寶藏之富爲中國最若不籌辦路政厚集資本爲開採礦產計強鄰環伺稍涉遲迴吾恐礦權落於

他人手矣早出瞭墩驛三十里九溝十八坡十里鹹泉可加濬寬深
設一店以便行旅十里乏馬灘皆無人烟三十里一碗泉驛有馬撥
官店一郵兵三電工一計八十里尖後十里石屹塔泉十里深溝十
里駱駝場子西出皆巨石山巖入鄯善界爲古樓蘭國境由此北行
十五里大山口風力甚猛來風從山豁間出故振振有聲轉而西北
而西而西南十五里車轂輓泉住鄯善縣劉令謨來接見詢問地方
風土人情事理多不明白有驛站客店三家郵兵三名此驛貫兩山
中其南山巨石係土砂結成多風窩玲瓏四透如蜂窩如鴿籠如土
室如佛龕大小不一隱見龍鳳蛇鹿各形惟妙惟肖天造地設絕非
人工所能描搆蓋天地清秀之氣不鍾之於人卽鍾之於物鬱蓄旣

久必發現五金鑛門坎石線層現疊生砂皆紫赤色其出金鑛無疑
惟水泉缺乏實不敷用後覓兩泉鑿之得水此地可名風窩山是日
行一百四十里併站也

沙山石灘多黑色碎石鋪面下仍有土何也蓋水冲雨洗泥淨石存
風吹日晒年久色黑其理然其勢不得不然也

初三日晴早雲午霽寅正出風窩山六七轉而出山口西西北行十
五里地窩子沿坡行一望平闊北臨天山宛在目前其遠尙有百餘
里常見白雲出其上橫亘山腰望之如海水平漫峯頭半露三十五
里胡桐窩子其南柳條墩高八九尺低亦二三尺枝條細短高不及
肩而根大可把盤結於地循此以往陸續不絕其北則胡桐樹寬數

里長十餘里歲經樵採留者身少多枯數不可計間或枝葉暢茂未能如前稠密餘皆柳墩及雜稷滿地二十里七個井子驛經制一員馬隊一棚大小店四家井十眼水深四尺坎厚丈許而北面數井僅厚五尺開坎井暗渠自高而下不過十餘丈本可引水歸渠藉以灌溉但沙多易陷幫不好立必須木石廂砌方能持久工費太巨也每站郵兵馬步各四每名月支餉十二兩分兩班一上一下日夜行四站較內地略快每年本省貼款七萬餘收費不到一萬所費不資實因戊申年俄人要求在迪化至塔城一路開辦台車代帶郵信恐侵我郵權爲此不得已之舉耳

初四日晴寅初西北行三十里天山口豎奇台交界碑將至北風大

作四面高山風聚一處故車轂輻七個井大石頭三處多暴風入山稍息山谷中屈曲紆迴不易暢行天山蜿蜒西來勢如萬馬奔騰至此截然中絕溝寬數丈路平如砥兩面高山如一石結成壁立千仞惟石質鬆脆山上下求一片整石而不易得杖屨崔峨硫磺氣盛又多金線煤鐵鑛尤富初西北繼北偏西北偏東又西轉東北均之正北向紆折盤旋於萬山中數步一轉灣每一轉灣山勢屈伸俯仰盤紆環抱如蟻穿九曲吞吐往復峻峰峭壁聳插雲端六十里中旋轉至百餘次三十五里二水溝泉流於道遍生青草十五里頭水溝有清泉足可墾地數石有驛站一店三家馬隊五名郵兵四東北半里許煤質早露長十餘里挖取燒之著火即燃再掘下層質當更美是

日行九十里環頭水溝皆山明日仍穿天山而行其脈皆自省南迤
邐東來

初五日晴寅正出頭水溝驛西西北行天山正幹至此東南行而西
北諸山皆其支脈脫砂變土勢漸平闊水草亦多地可墾種煤線遍
山軒豁呈露至大石頭六十里中除山坡溝窪外荒地之可墾者甚
多不收荒價限十年升科以廣招徠藉實邊地并採煤代薪廣籌生
計數年後當能漸集五里大坡石少土多路西草灘一望青葱二十
五里塞皮口有青泉水流潺潺能開稻田數畝引水南行可灌地十
餘石因壘爲房殖民亦便西北轉過山灣草場甚美十里塞皮橋舊
有房塲數間橋下亦有水五里對頭坡大橋長十數丈五里小石頭

多白石下有煤礦車行至此風漸大兩面山高中道平窪風行迅速
愈進愈急故其地經年多風雷雨時作山上草木蒙翳煤苗時露五
里五里莊子泉水甚旺一泉來源在四十里外至此而會由大石頭
穿過西面灌田六十石五里大石頭驛住南山掘土五尺卽露佳煤
火烈無烟惜無採者汛官把總兼帶馬隊駐此兵一棚店四舖一農
民一家有地六十石牛三十五頭馬四匹郵兵三是日行六十里余
初住此形雲忽合兩點大如錢雷聲殷殷有頃而止土人云自去年
至今第一次聞雷七箇井西四十餘里與鄆善接界東西兩鹽池相
距百餘里東池長二十餘里寬十餘里揭去土皮二尺下卽鹽塊厚
一二三尺不等味甚鮮西池較小寬數里長亦十數里出鹽如東池

惟味稍苦地僻人稀一任取攜無從禁止戶少無可專賣設局徒多擾累尙不如按丁攤課爲簡便也然亦目前計非經久策將來鹽場仍須收歸官有耳

初六日晴風早兩鐘半出大石頭驛竟日西行十五里蒙古包五里山口子十里官店前潘撫擬行台車此處設有站口今台車早已停辦而官站尙存空無居人四年前曾釀巨案行旅九人被盜劫縛而墜之枯井中兩狼入井食人亦不得出此案至今尙未破獲由此西行北山至此而盡大道在南山下十餘里卽天山北麓也自此至省皆傍山右行一片平原青草繁縟地皆可墾但少泉水故無人烟二十里大溝坡空房場兩處草尙茂密必有水泉五里駱駝場子二十

里沙河子類垣破壁六七家其地並無井泉不知當時何以駐此多家也二十里三十里莊子十里二十里莊子二十里三箇泉子驛有驛站一郵兵五店四舖戶一井泉四後路巡防馬隊哨長帶防兵五名駐此聞南山有泉距此十里水極旺民不知開渠引水官亦不爲提倡殊可太息是日計行一百二十里沿途須蓋房鑿井招人承住以通後路午後天雨微冷往視路北井泉距地皮二尺餘開坎井十數丈以北草灘皆可種灌矣是夜大雨

初七日晴寅刻乘馬往視南山水泉順溝直抵山根計大小泉十六眼皆在山北麓下游尙有三泉共十九泉足灌地二百餘石種已囑鄭令有敘墊款挖寬濬深由墾戶照數繳還閱畢起程西北行越數

平岡皆有舊渠陳跡當可規復三十里入大路過響水河始知夜雨甚大沙地亦泥濘路極寬平兩邊高原一望無際悉可開種並有舊渠知水棄土何設立州縣三十餘年尙荒廢如此乎南望天山多煤苗長數百里處處可開採裏山高峻積雪終古聞四月十二日新下雪尺餘以後連雨四次今日又雨前二年不雨今如此多豈天氣有轉圜乎二十里一碗泉清流潺潺有五泉新雨後水流更旺鄭令擬加濬寬深其地居民最少有頽垣十餘處小店二家見有新修房屋者亦興旺氣象二十里二十里莊子巡防馬隊來接見古城城守尉亦派馬隊三十人來此二十里木壘河有河渠灌田甚多南山雪水也守備孔福堂駐此有千把哨官數員商民六十家纏民十六家回

民二十家各村農民百三十八戶是日行九十里西西北向迎面風
急接禱齋信知升新藩甚喜二鼓後始成眠

初八日晴寅正出木壘河西北行下坡過河灘碎石滿地上坡行溝
中左右兩山坡多旱地麥苗青葱勝於水田詢之土人山田土厚地
腴不減平川今年自四月起雨水尤多豐收可望十五里咬牙溝出
溝上平坡南近雪山勢漸高峻北望平曠無邊烟樹蒼茫似有村落
廿五里東城口鄭令設茶尖於此西南行二十里西吉又名一渠農
民數十人來接余撫慰之此地遭同治末獮亂死亡子遺今尙存百
餘戶專靠泉水灌地不甚敷用近村多山少水迤西烟戶漸多天山
雪水灌溉不到若能引奇台二渠三渠之水庶免旱熯已囑鄭令有

敘代爲經理二十二里紅水壩八里舊奇台城設巡檢駐此縣令移住古城有驛站郵局釐稅鹽局商民四十家纏回十家境內共三十二渠每一渠爲一堡有鄉約農官司之居民專靠雪山融流附境四十里皆無井泉掘數十仞不見水地底皆沙故也是日行九十里初西北繼西南又西西南西北均之正西向城守尉忠錫五賜來接見王長發初任左營游擊專管巴里坤馬羣計印受五千一百零四匹李鎮克常在哈密接見摺報祇有四千六百餘匹計短六百餘匹該鎮到任不過半年孳生全無尙短原數如此之巨任意盜賣可想而知古城旗下馬羣每歲孳生六七成尙借巴里坤草廠過冬而巴里坤鎮馬廠水草豐茂如此不但無孳生且半年之間比原數更短

六百餘馬糊塗膽大至於此極尙安望其整飭戎行乎奇台東南自平頂山起西至古城遍山皆松樹土人砍伐每根徑一尺餘長兩丈僅售價銀二錢將來鐵路枕木用之不盡而附近居民皆伐以炊爨惜哉城南有澇壩引水導流以供汲飲冬則積水成冰鑿而用之以南雪山多茶樹長百餘里如炮製得法亦新省利也

初九日晴午後雨旋復晴寅初出奇台縣舊城西北行路多沙石兩旁亦有渠水左距松山三十餘里右二十餘里外卽戈壁灘北仍有平岡蒙古所游牧二十里腰站子院墻空無人居四面皆荒地左邊間有村莊田禾一望青葱雪山出雲蓬蓬如張蓋須臾漸滿山頭如游魚如奔馬如山勢之重疊上白下青奇峯逼肖山腰多松樹青

綠如帶頂上積雪不消山下草綠如茵褥鋪地水流出山築壩鑿渠分灌原野土人賴之二十里右傍戈壁灘行有駝羣數百牧其上駝夫五人乘馬守護之見余過此羣來跪於道旁以示瞻敬邊氓樸誠如是四十里腰站典史設茶尖於此有駱駝兩羣牧於草灘天山聳峙遠望如銅牆鐵壁高插天際歷朝以來匈奴雄據漠北多以天山爲南障勢使然也茶尖後仍西北行數里有駝羣百餘房場一處沿戈壁之北村樹綿連不斷一望平闊遠入無際此地爲高昌故國今行其野猶想見胡虜之風二十里三十里墩小店一家路旁駱駝三百餘頭牧人支幕守之有井深兩丈餘遍地芨芨草茂且密地勢北高南下能開坎井可資耕作三十里古城子漢爲蒲類後國郁立師

國開省後移奇台縣治於此城守尉滿漢官兵來接見津幫商人列幕道旁送余入茶座旗營學生等九十餘人器宇甚佳居民六萬餘人新疆商務以此爲樞紐內地商人自歸化城嘉峪關至此分赴各城西南亦自伊塔喀三處至此以茶綱布疋皮毛爲大宗

初十日晴寅正西南行滿漢官商兵學各界相送如禮左望雲山相連大有雨意兩旁平原敞闊土厚草肥惜人少荒多未能開種北望平窪數十里外土岡東西綿亘遠村綠樹蕭疏無際烏鵲前鳴逐馬亂飛似有所尋者約行十餘里過兩渠水流潺潺葦草茂密可織席辦草帽又過兩小渠一大渠至三十里驢站卽小村沿渠村樹相連南北十餘里東西四倍之由此西行多小羣牛馬芨芨草尤茂盛十

五里八里莊天山北麓一山突起土名紅山羅列如兒曹產煤巨數
百里孚遠西五十里水西溝產鐵兼產烟煤光亮如漆質輕火烈土
人謂之生炭奇台北四站出土煤質鬆色暗火弱而無烟僅供炊爨
火爐之用又謂之爛炭價皆廉五里大泉孚遠鄭令履亨設茶尖於
此沿渠多民居綠樹陰翳連接不斷三里頭工破垣甚多其西村莊
榆樹稠密夾道數十里密不透風土民不知翦削材杖歧生連根砍
伐以供炊薪二十里鷄窩子二十里孚遠縣卽濟木薩城宿於行台
居民二千五百戶約三萬餘人是日行九十里

里人郭榮發同治間從軍到此後種地四戶半合內地五頃餘築室
於孚遠南九十里山中詢以民間情形據稱每戶納糧兩石計八百

斤價銀在十六兩左右又納生炭二百斤爛炭二百斤建造學堂尙須按戶派出木板舊章平地征草山地征炭係屬通例今年自治局按戶勒交京斗糧五斗亦苛擾矣

十一日晴天淨無雲寅正出孚遠縣西門送者如禮市面尙繁富傍山西行六里長流河破垣甚多居民祇三家渠長十餘里沿渠皆有人家一溪清流兩岸綠樹望之神怡天山雄峙於南勢極高渾上多積雪中有青松下生芳草草外山溝溝外小山卽紅山也山外平原北通蒙古堪輿家言貴龍必有護從睹此益信二十九里三叉河店鋪數家有大渠渠邊皆榆樹土人不知削枝留幹叢生如荆棘不能成材祇供炊爨水西溝煤鐵礦在縣治西南距此十餘里由千佛洞

進口卽可至現有煤窑七座惟鐵礦無開採擬招商承辦以闢利源
自南山出口有渠長百里東西六十餘里由此西北行夾道古榆成
行溝洫縱橫麥苗半穗然貧民多而富人少土屋破垣不堪入目三
十五里三台驛住有商民數十家市面較盛是日行七十里行台尙
軒敞靜觀萬物鳥哺於巢雀噪於簷燕語於樑鷄鳴於堞生機活潑
咸有真趣樂何如之而新政煩興民罹於羅將有去而之他之虞亦
可歎也

十二日陰寅初西北行五里三台壩古榆夾道大經數圍渠道縱橫
數步一涉轉西西北行穿黃山而過山麓向北伸長數十里橫截大
道山上雲氣蓬勃饒有雨意有數百駝羣行於山溝之左望之如魚

麓之陳路北村樹零落種地無多三十里有空房場左面山脈至此而盡向西微北行高原平闊北面平窪中有人烟南倚天山橫亘雲表其氣雄厚過於五岳踰土阜十里至四十里井舊有井今堙沒矣其南里許有泉可汲阜康孚遠於此分界面飭阜令魏建勛責成土人鑿一井給銀六兩以便行人並飭孚令鄭履亨派鄉約將渠旁大樹削枝留幹使之成材參將王長發開列馬羣弁兵姓名呈閱仍西西北行左傍黃山北麓迤南出烟煤井深七八丈質輕火旺謂之生炭與水西煤鑛同土人鑿碎煤燒焦謂之爛炭厚約八尺寬不知其際共開二十二井每井六七人每人日挖一二百斤足敷售賣多亦無所用之將來生齒繁衍鐵路開通其利無窮也聞阜康一縣轄境

際百里祇有四千餘人不及內地一大村落其東七十里博克達山巔有海子週數十里淵深無際已飭魏令墊款鑿石開洞引水灌田所用渠費由墾戶攤繳事可立成二十里二道河子榆樹接連數十里如行窩集叢陰翳日疑其中有村落也至則渠樹縱橫水涸田蕪樹多枯幹頽垣破壁觸目皆是南北首尙有三十餘家有水故也餘則無人矣西與東圈上樹木相連有渠一道水流汨汨灌田築室亦足幽居又二十里入佛溝古樹夾道又六里滋泥泉驛有二百餘家巡防馬隊哨官長來接見入行台見省城文武官員十餘人是日行九十里午前至聞二道河子上游有泉囑魏令開之天山至此折而南矣

十三日陰雨點鐘出滋泥泉西西南行月落星稀黑雲欲雨電光閃
閃雷聲殷殷與內地無異從前無雷國今亦有雷矣三十里小泉有
居民一家至此天色大明路旁芟芟草甚茂密沃野萬頃民不知鑿
井指爲無水不能開墾左邊山麓渠樹相連東西十餘里安得謂無
水乎有虹見於西方諺謂主雨明祖君臣有詩云誰把青紅線兩條
和風和雨繫天腰玉皇昨夜鸞輿出萬里長空駕彩橋已而雨落肩
輿滴滴有聲回視博克達山已在東南方矣二十里大泉南麓村樹
稠密烟戶稍多茶尖畢仍西西南行過兩渠濁水北流想係雪山之
水苦於人少仍一片平荒又過一渠濁水橫流於道再西夾道綠陰
渠水縱橫其源從博克達山海子入地二十餘里湧出灌地二百餘

戶二十里東五運三十餘家土人設幕於道率學生廿人接余南十里許小黃山出煤深二三丈可燒焦炭村樹濃陰阡陌比連九龍街水湖各村綠葉繽紛一色相接二十里阜康縣青苗在野綠樹蔽天首府中軍來此送印接見文武數十員午刻接印晚封摺是日行九十里已初到

十四日晴有雲寅刻拜發謝恩奏事兩摺出阜康西門西南行博克達山巔雲起如張蓋如覆幕如大涼亭如纏頭美人愛惜頭面以白沙籠罩不使露頂也渠水灌地數步一渡輿夫襪履皆濕沿路綠樹青苗鳥語花香頗足欣賞塞外少雨井水山泉咸可寶貴此地大水漫溢於道官民皆不知愛惜何也十五里頭工五里四十戶新莊南

山煤線又起土人挖煤山塌地陷井泉堙塞新莊始無人居傍山麓西行一片荒涼皆地枯水涸所致又西西南行十五里三個莊南山紅土崩裂下有鐵煤溝口窄而曲水向北流有人家紅柳稞子遍地高不及尺十五里甘泉堡官店一民店二有泉不甚旺從前居民人家今寥落矣茶尖畢西南行回顧博克達山高出雲表如半壁插天常有白雲護其頂四面陡峻中抱一池名爲海子水深一二十丈不
等或待我開闢以活斯民耶南偏西行高岡平川凹凸不一順川南
行又南偏東行天極熱有牛羣牧於右坡由此上西坡入山溝南偏
西二十里黑溝茶尖畢出山南偏東博克達山在其東又南行俯視
平川綠樹綿亘數十里古牧地也青苗遍地村戶相連羊羣千百牧

於野博克達山一幹至此轉南行經吐魯番折西至迪化其環繞目前者層出疊見皆天山之餘脈也六里東工渠樹相連南偏西行一望平原多未墾種水不足也是日計行九十里古牧地居民二百餘家屬迪化境接纏民三呈面訊分告之

十五日晴有雲寅正會三客出古牧地南行微偏西遙望博克達山冉冉出雲始露山峯尖須臾盡沒十里卡子灣小店一家綠陰夾道渠水分流東西兩土嶺相距不過二里許榆木叢生十里七道灣南偏東行道旁渠水流聲潺潺爽心豁目此吾平日創辦實業期許如此而未得一見者今已實有其境矣民非水火不生活余於邊地益信八里水磨溝有機器局余入閱視造銀銅圓槍子用水激動之有

溫泉冬日不凍頗省火力俟物力殷裕尙可擴充十二里省城東門
官商兵民出接道左進城住阜華館

宣 統 三 年 十 二 月 日

書渦陽袁中丞公撫新記程後

徐翔采

間嘗讀山海經山川草木鳥獸鑛物之名纖悉靡遺讀天下郡國利病書歷代形勢之沿革國計之盈虛民生之休戚無不燦然大備驚歎爲空前絕後之作孰知讀渦陽袁中丞公撫新記程崇論宏議儼然合政治實業有爲山海經所不能詳郡國利病書所不能言而一以貫之者公以諸生起田間周歷海內外艱苦備嘗其居官也躬行實踐所至有聲中外聞風嚮慕者已有年矣故其記載不爲高尚之論以驚世炫俗據實直書切近事功今天下士大夫談政治實業動輒數千萬言丐世界之信仰及考其政績按其實實行不顧言徒借此爲干利祿釣名譽之具皆非公之素志而爲公所羞爲也公以宣

統三年五月撫新采以九月到省一見公卽語之曰新疆開行省三十餘年生聚未謀教化未興地利未闢軍政未修歲入不敷歲出尙賴協餉接濟天下有變將何以繼其後耶誠探本窮源之論其識見固有高出尋常萬萬者設公早撫是邦戈壁苦水窮荒現象尙復見於今日乎蓋公之來殆天將有以啓新歟不然以無雷零雨之邊荒今變爲澍雨迅雷之大陸萬物之化生也雷以震之雨以滋之日光之影射雪水之灌溉鼓暢其化生之機常苦於不足前此撫新者衆矣功如劉襄勤賢如陶勤肅雷雨必待公而後多哉此蓋地利之興廢天心之向背視人事爲轉移者也美之治菲列賓也以工藝實業日本之治北海道也以漁業農林殖民政策因地而施公治新所見

隱與昭合可知體國經野無中外無古今一也全國日見交通獨西
北袤長萬千里爲中外人士所罕到有志遊歷經營者尤苦於無指
南則是書得毋奉爲圭臬乎采幸居公之門下而樂公之書成出以
饗天下士也於是乎書

